

東  
華  
續  
錄

東華續錄

同治十三

臣王先謙敬編

臣張式恭恭校

閏八月辛巳朔 定陵金劄合龍○諭內閣宗人府奏已革親王  
甲數請分別裁撤一摺另片奏田產應否裁撤例無明文請旨遵  
行等語已革鄭親王端華怡親王載垣獲罪甚重其紅白藍甲並  
田產等項卽悉行裁撤亦屬咎有應得惟念伊等先人以賢親之  
誼功在旂常若因子孫不肖致令乃祖乃父祀事闕如並本支族  
人因之困乏眷懷勳舊良用惻然已革鄭親王端華僅有原領紅  
甲數目其藍白甲名目當時並未分清除端華名下分內月領外  
照定額不敷裁撤查係早年卽分與眾宗室等支領著將端華名  
下應裁甲數裁撤餘均加恩免其按名攤扣繳還與見在伊族中

人等所分之各項甲數仍畱給該族眾作爲養贍之用已革怡親王載垣除紅白甲照例裁撤外所有藍甲著加恩勿庸裁撤其浮於定額之藍甲五分亦著一併賞給仍分撥各房宗室支領至鄭獻親王怡賢親王分封時所得田產並著毋庸裁撤畱爲各該後裔歲時奉祀之需以示篤念宗勳有加無已至意○諭議政王軍機大臣等耆齡等奏克復處州郡城並收復縉雲縣詳細情形一摺處郡業經克復溫台等處防務稍鬆乘此軍威與左宗棠所部聯絡進攻金華各屬自不難次第廓清惟此次攻克處州總兵秦如虎林文察等實屬異常出力卽各營練勇亦均能奮勉效命殺賊立功見在規取金華正須厚集兵力該督當恪遵前旨毋論粵勇閩勇斷不可豫存成見稍有區分其廖士彥等所募勇丁旣據該督查有虛名冒餉等弊自應量加裁汰以昭覈實此外屢次打

仗出力克復城池各營將弁兵勇該督仍當加意拊循俾該軍士等踴躍用命林文察秦如虎皆得力戰將當善爲委任以收指臂之助左宗棠見在攻克油埠進圖蘭溪該督應由何路進兵策應著與左宗棠酌度機宜以期節節掃蕩迅拔堅城將此由六百里諭令知之○諭本日據耆齡慶端奏克復處州及縉雲縣詳細情形處城旣拔閩省兵勇自應會合浙師迅攻湯谿力圖進取耆齡已派康國器督率廣勇相機前進而屢商助剿慶端堅執不允慶端欲畱林文察等臺勇防守台處兩郡耆齡則謂與其停兵一處不如分路進攻該督等意見不合已有明徵號令紛歧最爲行軍所忌是以責成耆齡專辦以一事權惟慶端自督兵援浙以來閩防尙未被賊闖入且收復浙省郡縣不少不得謂所帶兵勇全屬無益乃耆齡到浦接防卽將閩勇裁撤大半是該督所恃以衝鋒

殺賊者全仗廣勇廣勇向多不法且恐遷地弗良閩勇散無所歸必致聚而生事左宗棠近在衢州見聞較確著將耆齡近日辦理軍務是否確有把握抑係豫存成見所撤之閩勇是否實係可裁林文察奏如虎係慶端部下得力之將耆齡能否駕馭俾能照常出力一併詳細具奏前據曾國藩奏左宗棠進兵尚未得手劉培元攻擣龍游未下復據耆齡奏左宗棠督隊進圖蘭溪與僞侍逆相持正急各等語迄今未據該撫將近日軍情馳報懸系實深嗣後務須隨時具奏以慰廑念將此由六百里諭令知之○癸未河南團練大臣毛昶熙奏剿平亳州吳家園賊圩報聞○甲申多隆阿奏臣遵旨回剿髮捻當派義中親兵等七營先後由商南拔隊回剿荆子關之賊適副都統穆圖善由商州趕到商南當令率軍繼進臣亦輕騎馳赴前敵相機調度八月二十一日傳令各軍於

五鼓出隊行約十餘里該逆以悍賊七八百人由柳林溝前來穆圖善飭各營奮力衝擊該逆曳戈回奔我軍跟蹤追殺沿途約斃賊二百餘人直追出柳林溝山口僞啟王梁城富率僞主將馬融和等大隊已排列迎拒糾迤五六里約一萬四五千入穆圖善督率各營分路並進鏖戰三時之久連斃黃衣馬賊二名悍賊百餘名該逆敗退我軍追抵荆子關沿途又斃悍賊五六百名時已酉刻荆子關突出白旗黃旗二股悍賊約八九千人在荆子關街外接應僞扶王陳得才率黨六七千人在河西南華一路出隊因河水漲漫不能過河卽於山岡排列遙爲聲勢我軍往返衝擊直至四更各營將士愈戰愈奮拋擲火箭將賊所蓋草棚帳房一併燒毀臣復添派副將梁洪勝等分帶馬步前往接應鏖戰竟夜約斃賊二千餘名該逆紛紛敗潰浮水淹斃者不計其數餘賊向浙川

大路而逃首逆陳德才亦卽由河西向南華竄走我軍追殺過關  
二十餘里始收隊回關立將荆子關克復臣當飭金順雙福等三  
起馬隊暨義中親兵等七營前往浙川一路追剿首逆陳德才一  
股向南華一路竄去已飭將河下船隻搭造浮橋令穆圖善統率  
六營過河進殺並飭何紹彩在鄖陽一帶嚴密防堵臣於二十三  
日仍回商南營次查逆匪雖經此次痛剿少挫其鋒然其數過眾  
兇悍異常浙川一帶爲秦豫楚三省接壤之區刻下勝保全軍已  
離豫境臣軍若復離楚一經竄入力難抵禦流毒伊於胡底且楚  
省轉運餉道早爲該逆截斷我軍見駐之地皆係重山疊嶺軍糧  
無從採辦惟有嚴飭各營將浙川後路打通則湖北餉糈當可源  
源接濟此股撲滅後仍應遵旨迅速入秦剿賊至臣前飭雷正綰  
帶兵至鄖陽之西迎擊者原恐逆賊竄入秦境乃撫臣瑛棨來咨

詳雷正綰一軍駐省防守雷正綰知臣營兵力太單自雷三營  
駐省其餘三營仍令折回商南頃據探報毫潁捻匪姜台凌孫老  
危等各率黨眾突竄內鄉西平一帶離商雒僅數十里臣不日移  
營前進此路空虛擬將三營雷駐商南俾得隨時策應上諭內  
閣多隆阿奏督兵攻克荊子關連日大獲勝仗一摺此次多隆阿  
回軍堵剿髮捻各逆以杜入陝之路卽能以少擊眾斬馘多名克  
復要隘洵足以塞賊膽所有打仗尤爲出力各員著准其彙案保  
奏○諭各省速結京控積案○乙酉諭議政王軍機大臣等官文  
奏川匪竄入楚邊旋經擊退並髮捻又犯老河口見派官軍馳剿  
一摺川省逆匪萬餘由大甯及陝西平利縣境竄擾竹谿竹山當  
經該處文武督率兵勇剿擊斬獲甚多立將城池克復餘匪復經  
沿途紳練截殺零星敗回平利關等處鄂省地方官紳尙能認真



備豫猝然有警卽時將賊擊走出境惟是游魂靡定仍復徘徊陝  
鄂之交難保不乘虛回竄仍著官文等督飭所調何紹彩之軍覘  
賊所向實力堵剿浙川等處由南陽西竄髮捻大股昨經多隆阿  
馳報於荊子關痛加剿擊茲據官文等奏見復竄及李官橋及老  
河口地方該大臣等已飭梁作楫馳往剿辦並飭金國琛各營嚴  
鎮襄樊兼爲後路策應著多隆阿速飭全順雙福暨穆圖善等軍  
會合兜剿該逆人數雖尙眾多而屢經懲創亡魂散膽之餘乘此  
併力齊擊諒不難聚而殲旃獨豫省各路派撥官軍多屬紙上空  
談毫無實際致令髮捻各逆得以縱橫肆擾見在毫捻姜台凌等  
西南分竄聞又至裕州等處鄭元善究於何日出省著卽調派得  
力之兵與僧格林沁所派恆齡等軍合力追剿並可與楚軍周鳳  
山歐陽正埔等入豫之師聲勢聯絡其陝州竄匪並著該撫馳抵

河洛懷遠疊次諭旨迅速籌剿儻再任令蔓延或復西竄秦疆惟鄭元善是問該撫疊經嚴諭若竟不自振刷一任諸軍畏縮賊勢猖獗必將該撫重治其罪勿謂朝廷寬典之可幸邀也將此由六百里各諭令知之○諭勝保奏督軍掃蕩西安附近賊氛平毀回寨暨同朝賊蹤已退請飭多隆阿專辦陝南等摺片勝保抵西安後將灞橋杜曲等處及景陽城東西長條村回匪巢穴攻毀所有六堡寨一帶肅清省城業已解嚴雷正綰率烏勒興阿成祿等軍由咸陽進發將馬家堡老巢掃蕩援解涇陽之圍所辦尙合機宜惟省門旣已解嚴近省賊蹤已淨勝保應懷遵前旨剋日出省相機督剿毋得以居中調度爲詞安坐省垣致有延誤勝保擬先由西北兜剿截該匪竄入甘省之路固是要著惟東北同朝等處與晉毗連陝州見在有賊竄擾亦與晉省一河之隔晉省兵單將寡

亟須妥籌兼顧該大臣出省後仍應將同州一路布置周妥自東而西與雷正綰諸軍兩面夾剿並懷遵昨日諭旨乘賊初起迅圖攻擣毋得任令負隅自固致剿辦又形棘手陝事及早了結即可分出兵力專辦髮捻於大局實有裨益所有鳳翔咸陽涇陽等處回匪並著勝保嚴飭將弁實力攻剿勿任蔓延另片奏邠州知州韓鈺等請兵張皇等語該州逗遛回人二百餘名究竟是何情形作何辦法未據詳晰奏明儻果係奸匪有心盤踞自當悉數殲除非有兵力恐難擒獲也將此由六百里各諭令知之○諭毛鴻賓奏連破黔匪賊巢克復天柱邛水城池並令江忠義防堵楚粵邊境各摺片湖南兵勇越境進剿黔匪辦理認真尙能不分畛域惟鎮遠思州一帶匪徒尙多逆首姜映芳尙未擒獲毛鴻賓務宜督飭在事文武乘勢進攻迅將賊匪殄滅淨盡毋畱餘孽思州一路

已有黔省總兵劉義方等軍惟兵力尙單著韓超添調兵勇前往會合楚軍併力夾攻毋稍鬆勁鎮遠一帶並無黔省兵練與楚軍會剿該處係黔省地方韓超豈可置之不顧專恃鄰省代爲剿辦並著迅撥兵勇前往該郡會合攻剿毋稍玩忽見在該省軍務緊要急需知兵大員前往督剿著毛鴻賓速令江忠義馳赴黔省並令將所部陳鳴志管帶赴黔其赴粵援剿之師並著毛鴻賓另行籌撥蓮塘股匪負隅日久易元泰等軍既不敷分布劉長佑卽當酌添兵勇與楚省援軍會合責令帶兵各員迅圖攻克毋任延宕將此由六百里各諭令知之○諭毛鴻賓奏參員挾私具控請特派大員查辦一摺據稱湖南江藍廳同知椿齡言語麤率識見鄙俚團紳汪際唐集團保衛地方該員指爲土匪臚列多款稟請懲除經前巡撫駱秉章提省審辦前署巡撫翟誥委同知楊鼎勳往

查毫無實據前署長沙府知府李逢春研訊係屬虛誣稟請結案  
毛鴻賓訪問椿齡於此案酷刑逼供實有挾嫌故勘情事並因該  
員前署巴陵縣任內聲名狼藉於年終甄別案內奏請革職乃數  
月之後忽揚言總督係伊姻親必當往求洩忿果在總督衙門具  
控楊鼎勳李逢春招搖陷害兼有毛鴻賓向屬員借貸伊因不遂  
所欲致被參革並牽涉該撫隨任親戚置買使婢指爲毛鴻賓所  
娶之妾各等情該革員既有稱與督臣姻親毛鴻賓曾經官文保  
薦或恐礙難查辦請欽派大臣來南等語此案椿齡以考覈被參  
人員許告上司本應立案不行惟所控之楊鼎勳卽係委查汪際  
唐之員李逢春卽係承審汪際唐之員是否未能袒護同僚致招  
怨憾抑或查審果有錯謬致貽口實著官文嚴樹森卽將汪際唐  
一案人證覆加審勘椿齡是否有酷刑逼供情事毛鴻賓向屬員

借貸及所控各情有無確據一併詳細查明據實具奏官文向能宅心大公親戚故吏之嫌無所用其引避著卽會同嚴樹森嚴密訪查秉公訊辦原摺著鈔給閱看將此諭令知之○官軍復湖北竹山竹谿縣城○丁亥諭內閣據晏端書奏遵查廣東省官紳辦理釐金弊端大概情形並許慶璐等恃有大吏護符堅不吐實請旨革審各等語除陶昌培並其黨陶二卽陶開泰業經勞崇光等因該犯多交匪類情罪重大於訊明後卽行正法外廣東候補知縣許慶璐廣西融縣知縣劉承緣出入督署遇事招搖均著先行革職補用遊擊張昇耀被參私製礮船走私漏稅各款情節較重著一併革職均交晏端書提集人證逐款研究務得確情從嚴參辦勞崇光督辦廣東釐金信任非人措置乖謬著先行交部議處尋吏部議以降三級調用不准抵銷從之○奉天回民互鬪諭王

明等嚴緝首惡分別安撫○論文煜譚廷襄等迅捕直東交界馬賊○戊子諭議政王軍機大臣等鄭元善奏督師出省馳抵洛陽擒匪折竄盧氏永甯派兵馳擊一摺擒匪竄擾新安陝州等處經各該州縣會督文武剿擊小有斬擒見由靈寶閭鄉折竄盧氏永甯該撫飭楊長春於宜永嵩伊各境邀截賊蹤自駐洛郡藩籬河北策應宛南辦理尙爲妥協著卽飭令楊長春及各地地方官激勵兵勇紳團沿途節節剿殺無任再行竄擾內鄉汝郊等處昨據多隆阿奏姜台凌等股復率黨突竄內鄉西平一帶該將軍仍回商南卽日移營前進等語見在多隆阿諒已移軍進剿卽著多隆阿鄭元善嚴飭派出各軍將內漸賊匪痛加剿洗以靖地方圍撲陝州賊匪竄至永甯難保其不仍由盧氏等處竄徧潼關多隆阿仍應力圖兼顧毋令竄越鄭元善請調張寶禧一軍回豫以咀匪入

潼關之路該員守禦同州是否可以抽調著咨商勝保妥爲籌畫以期萬全無失昨據英桂奏髮捻各匪連日搶渡均經官兵擊退此賊竄往永甯旣須防其回偏潼關更應防其折由沿河一帶圖撲晉疆著英桂嚴飭所屬文武督團守禦無稍鬆懈本日據勝保奏滇匪郭刀刀一股闖入瓢坪廳欲由紫陽石泉連結洋縣之賊已飛飭毛震壽調兵往剿惟該藩司兵力未厚恐其不敷分布何紹彩能否出境助剿並著官文等查明迅速具奏鄭元善摺內有浙川賊匪已由李官橋沿河竄入均州光化一帶之語官文前奏已飭梁作楫馳往剿辦並飭金國琛嚴扼襄樊爲後路策應近日辦理情形若何均光等處之賊曾否擊退並著官文等詳悉奏聞鄭元善又奏洪貞謙行抵葉境將張鳳林夥捻王四等二千餘人殄滅殆盡辦理尙屬認真其兵力不敷該撫已飭張曜抽撥馬步



勇隊前赴南陽交洪貞謙調遣藩司張曜攻剿陳大澹老巢日久無功見復抽調兵勇移交洪貞謙仍著嚴飭該司就見有兵力嚴密圍剿毋得藉口兵單致陳逆潰圍旁竄鄭元善見已馳赴河洛豫省剿匪事宜是其專責務當振刷精神通籌合剿使軍務地方日有起色方爲不負委任若仍前玩誤自問當得何罪懷之慎之將此由六百里各諭令知之○諭勝保等奏派兵攻剿咸陽賊巢獲勝大股回匪回撲省城豫捻竄逼潼關暨攻擣馬家堡賊巢續獲勝仗陝南官軍進剿洋縣踞賊情形各摺片勝保自抵陝省疊次諭令出省督剿前據奏稱西安解嚴近省四五十里已無賊蹤何以此次忽有大股回匪徑撲城關其沙河老巢與王閣村倉頭鎮等匪眾聚集來犯何得如此迅速豈城外數十里間遂無一旅攔截遽令逆眾得以撲至關外連日官軍迎剿又不能大張撻伐

使逆回撲入東關肆其焚殺雖經開城出擊將關廂馬賊悉行壓  
出而逆勢猖獗難保不復來撲犯總由勝保未遵諭旨親督官兵  
出城駐紮致賊得以窺覷先發逞其兇燄咸陽馬家堡賊巢疊次  
進攻亦未甚爲得手此時斷乎不可鬆勁雷正綰督率各軍務卽  
激勵兵勇先將此路大股賊巢迅速破滅以振軍威方可節節進  
圖掃蕩從來名將督兵甘苦與將士共之未有自處安逸之境令  
將士躬冒矢石而能使其用命者勝保仍應出省駐紮擇要布置  
毋得專意駐守省城致啟逆回藐視之心且令部下將士有所藉  
口潼關捻匪逼近鄭元善奏業將張寶禧一軍調回迎剿王佐臣  
之軍已將陝州竄匪擊回卽著飭令就近與豫軍聯絡策應惟同  
朝緊接晉疆防堵尤關緊要成明兵本不多張寶禧如已折回潼  
關則同州一帶兵力愈薄該大臣仍應妥籌兼顧毋稍疏虞洋縣

勦賊亦未得力著卽飭令毛震壽等迅圖攻勦前竄竹谿股匪回  
竄甌坪廳並飭該地方文武實力堵禦毋任得與洋縣之賊勾結  
此股竄匪前據鄂省奏聞已飭何紹彩探蹤追擊本日駱秉章奏  
亦已派令易佩紳越境追勦並著飭令毛震壽等卽與川楚各軍  
會合兜勦可圖聚而殲旃陝州竄賊節經諭令鄭元善責成勦辦  
豫省之軍近來多不得力勝保仍應飭令王佐臣等戮力殲除毋  
使再行西竄與回匪勾合更形棘手將此由六百里諭令知之○  
諭駱秉章奏滇匪分竄陝境派兵追勦並接據代理雲南藩司岑  
毓英稟阻張亮基赴滇各摺片覽奏均悉四川鶴遊坪踞逆分股  
下竄大甯縣城口廳等處節經兵團截殺僅餘千人竄往陝西平  
利縣境此股逆匪前據官文奏報由平利竄陷湖北之竹山竹谿  
復回竄陝境之平利關等處並本日勝保奏平利郭逆回竄關入

孰坪廳境有圖句結洋縣賊匪之信是該逆游魂靡定雖疊經懲創而所過攻城陷邑勢頗鸚張萬一與洋縣股匪句結尤恐滋蔓難圖駱秉章見已派知縣易佩紳帶楚勇二千一百名馳往援剿著卽飭令該員與楚省何紹彩之軍聯絡聲勢覘賊所向實力夾擊並卽札知陝西藩司毛震壽撥兵迎截務將此股逆匪悉數殲除毋任再行紛竄至石逆自長甯敗竄敘永之後見在仍由江津綦江原路奔竄勢將復窺渝涪川東爲精華所聚該督務當厚積勁旅飭令帶兵各員實力兜剿以杜石逆回竄之路雲南軍務前據張亮基奏有刻不容緩之勢見據岑毓英稟詞擬請潘鐸早日赴滇監督該代理司及馬如龍辦理任其興革並稱張亮基如帶兵赴滇恐漢回槩行激變卽有意外之虞等語是徐之銘等於地方諸事任令回眾把持且欲互相固結藉以自全其狂悖叵測情

形顯而易見。滇事如此。岌岌朝廷。豈有置之不問之理。潘鐸張亮基當仍遵勅。次寄諭迅速起程。並於沿途地方先行張貼告示。俾知此來並非專事剿回。既以釋回眾之疑。兼以孤徐之銘等三人之勢。仍當審度機宜。毋得輕率大意。轉致變生不測。辦理愈形棘手。將此由六百里各諭令知之。○允鄭元善奏抽收長蘆鹽釐餉。○撥僧格林沁軍馬隊千名赴陝西助剿。○以殷兆鏞爲內閣學士。由詹事遷○已丑。曾國藩奏賊目洪容海投誠後。進剿建平。小挫而退。其部下頭目眾多。各爭雄長。洪容海不能彈壓。有僞目張得勝、陶子篙等帶二萬餘人投歸。僞輔王楊七麻處又有僞目朱大椒、黃三元等帶二萬餘人在廣德州內亂。與洪容海自相仇殺。洪容海帶心腹萬餘人奪門而出。投歸甯國。鮑超營次廣德州。遂仍爲賊踞。鮑超仍照前議。令洪容海酌留三千人編立五營。隨同官

兵打仗攻克廣德以贖前愆臣思招降之事古無良策必降將之才足以統馭其黨而後無反覆爭鬪之虞又必官兵之氣足以懾服降人而後無幹弱枝強之患今洪容海歸順之眾較前數大減後患亦較少臣所深慮者見在楊輔青黃汶金賴汶鴻古澄賢諸僞王廬集於廣德建平一帶又有已降復叛之張得勝朱大椒等克篋彌增又據左宗棠咨僞侍王將由浙境赴援金陵自甯國廣德決戰而往羣賊將萃於皖南而鮑超營中疾疫大作勇夫病者萬餘人死者日數十人張運蘭朱品隆唐義訓各軍十病六七張運蘭之胞弟張運桂亦已病故卽去臘堅守徽州苦戰得全者也曾國荃金陵營中病者亦逾萬數左宗棠軍中病者亦復過半若秋間有大股惡賊深恐羸卒不足禦強寇中夜憂思實深焦灼至李鴻章奏洪逆已移至蘇州係屬謠傳並無其事此軍務最大關

鍵臣不敢不留心訪察至張運桂等立功後病故各員容臣彙奏請卹上諭議政王軍機大臣等收降之事自古爲難此次洪容海部眾反覆廣德復陷亦在意計之中鮑超所辦尙屬合宜今洪容海歸順之眾人數尙復不少固不可不防後患然旣准其來歸亦不可待之過刻致令反側阻日後從賊者反正之路諒該大臣必能妥籌盡善也逆目楊輔青黃汶金等旣膺集廣德建平一帶又有已降復叛之張得勝朱大椒等兇燄彌增其僞侍王復將山浙赴援金陵羣醜聚援其勢必死力來併而鮑超營暨曾國荃張運蘭朱品隆唐義訓各軍皆疾疫大作覽奏之餘曷勝軫念此時金陵進攻自不能急求速效惟在各營堅壁自守總須立腳不敗之地以待可乘之機廣德固須急圖攻拔以據形勢而甯國尤爲地所必爭著飭令鮑超等竭力固守使賊不得肆其狡謀諸營將

士病疫者該大臣其加意拊循隨時存問見在諸悍賊既麇聚於廣德建平一帶杭城及蘇松各屬必甚空虛該大臣可卽飛檄左宗棠李鴻章各於進兵要害處或實力進攻或虛張聲勢使賊奔救不遑以分廣德麇聚之勢至下游江而空虛師船寥寥不敷分布吳全美尙爲得力如李德麟等皆不足恃該大臣前有擬令楊岳斌帥船駛赴下游之奏未識何時可到下游江面水師如有整頓布置俾賊無旁竄之虞著卽妥籌具奏將此由六百里諭令知之○袁甲三奏查苗沛霖假團練爲名包藏禍心其一切恣睢狡獪情形均在 聖明洞鑒之中自勝保離皖後苗沛霖頗有懼心當此捻患未平不宜持之太急自應暫假權宜於設法羈縻之中寓力求鈐制之意使其不敢妄動方爲計出萬全臣前聞苗沛霖願將壽州正陽城關讓出旋聞有反覆之意八月十一日苗沛霖



親帶戰船數十隻馳至懷遠傳言欲赴淮東

臣

上年派

臣

子保恆

駐紮長淮衛蚌埠並派兵紮營劉府集原爲防苗及進兵地步此次苗沛霖至懷大約因臨淮大隊均調赴湖溝剿捻而臣又患病新舊交替之時欲圖乘閒一逞爲搖惑人心之計臣不動聲色密派雲南鹽法道李榮藉校閱兵練爲名前赴蚌埠水陸布置派儘先參將吳殿元管帶馬勇至劉府以西巡哨密諭懷遠練總邵徵祥傳令苗沛霖來臨謁見苗沛霖知我有備遂於十四日失望而去見據署壽州鎮總兵李璋稟報甘肅安肅道蔣凝學於十五日帶領水陸各隊行抵正陽二十一日進至壽州見在壽州苗練業已全數退出正陽關卡亦經安設軍民均甚安靜苗沛霖已回老寨下蔡地方仍係該練踞守此近日苗練情形並退出壽州正陽之原委也又奏查勝保前辦苗沛霖撫事所以物議沸騰者不在

因時權變而在顛倒是非又創爲報重施輕之說使苗沛霖心懷  
觖望在僧格林沁老成持重萬不至蹈其覆轍惟臣鯁鯁過慮竊  
以爲有不可不防者四苗沛霖倡亂以來未常輕離巢穴其眾亦  
未曾遠出恐僧格林沁未悉情形一旦調赴北路剿捻以獷悍之  
眾而又習慣行軍必將縱橫馳突愈不可制此不可不防者一也  
苗沛霖素仰僧格林沁威名深憚官軍馬隊祇可遙爲控制不可  
與之合隊恐其竊窺北路虛實學習馬兵步伍更啟縱橫之心此  
不可不防者二也苗沛霖於楚師畏而惡之自勝保去皖無所倚  
恃氣頗自餒見雖退避楚師而其實未嘗甘心今僧格林沁處旣  
有勝保爲之先容又有博崇武從中簧鼓恐將多方挑唆使僧格  
林沁與楚師意見不能相合此不可不防者三也苗沛霖到處張  
貼告示自稱奉旨督辦團練有不附從者則以違旨攻之恐再假

以威權則植黨愈多更不服地方鈴束此不可不防者四也臣愚慮所及不敢不直陳於君父之前應如何密飭僧格林沁斟酌辦理之處出自聖裁上諭袁甲三奏擒匪敗竄回巢復圖東竄見飭嚴密戰守並密籌進剿一摺據稱北竄另股擒匪在羊山地方經僧格林沁馬隊截擊大獲全捷該逆等敗回寶案山又被該處團練官軍截殺八月二十三日賊全股已至宿州西四鋪及孫疇計兩日半奔竄四五百里見探李成任柱任縛得等均各回巢帶往馬步賊眾所贖不過十之二三有即日裝旂出竄由靈泗而擾清淮之謠袁甲三已飭徐鵬等扼要駐紮嚴守以避其鋒出奇以挫其銳辦理深合機宜著僧格林沁嚴密偵探如果該匪裝旗東竄卽速派勁旅直擣老巢爲一勞永逸之計袁甲三亦卽派兵攻剿孫疇等處逆巢該逆回兵救援便可於中途邀擊必能得

手清淮等處防務緊要吳棠務須嚴密防範並於臨淮徐宿等軍  
互相聯絡不可稍存玩忽致誤事機靈宿境內新撫各圩袁甲三  
隨時派員妥爲安撫使人人樂爲我用以收眾志成城之效另摺  
奏近日苗練情形並壽州正陽關均已收復道員蔣凝學帶兵進  
城駐紮又片奏苗沛霖有不可不防者四請密飭僧格林沁斟酌  
辦理等語所籌均尙周密苗沛霖陰賊險狠反覆無常惟尙知憚  
懼僧格林沁威名必當恩威並用潛消其跋扈之漸隱防其狡毒  
之謀見在捻患未平時須杜其勾結俟兵力既厚再當酌覈辦法  
諒僧格林沁成算在胸必能曲爲體會也袁甲三密片一件著鈔  
給僧格林沁閱看將此由六百里各諭令知之○廣廣西鄉試中  
額二名臨桂縣學額十名全鬱林博白各五名陸川四名靈川二  
名興安陽朔賀昭平蒼梧桂平馬平宜山河池北流各一名○庚

寅諭議政王軍機大臣等文煜遮克敦布奏會辦騎馬賊匪並分兵剿捕土匪譚廷襄奏督軍擊退教匪外援及攻剿蘭費兩屬幅匪情形並檄調道員陳顯彝接捕匪巢各摺片覽奏均悉四女寺賊巢既據該督撫等訪查確實自應迅速掩捕擒穴殲渠著文煜譚廷襄遮克敦布仍遵前旨密商會辦調派馬隊剋期並舉遮克敦布卽督率侍衛益謙等會同道員陳顯彝等並前次派往之遊擊王秀守備德克紹等兵勇務將恩縣德州一帶賊巢趕緊洗蕩淨絕根株毋令聞風逃逸鳳凰山教匪憑險負固覽該撫繪圖貼說非厚積兵力不能仰攻譚廷襄見已調兵將南路散匪及王廣繼會匪擊退該匪勢漸窮蹙著卽嚴飭協領海羣道員黃良楷等由西北路進攻並令總兵扎隆武等督帶兵勇嚴扼東北幅匪勾結往來之路其南面一路該撫業已函商副都統德楞額由滕縣

之城前等處進逼著卽飛咨該副都統迅卽拔營前進與各路官  
兵聯絡聲勢以期一鼓成功至蘭費幅匪經蘭山縣長廣遊擊石  
占鼇等分剿或襲破匪圍或殲擒匪首而東路賊巢林立亟宜設  
法攻取並著譚廷襄速飭在事文武員弁併力進剿務將旗山磊  
石城前等圍次第削平毋畱餘孽將此由五百里各諭令知之○  
辛卯多隆阿奏據探姜台凌大股約有三萬餘人直犯商南臣僅  
帶親兵七十餘人萬難力禦因飛調浙川親兵等四營前來援應  
八月二十六日黎明該逆果率大隊直薄城下臣示以鎮靜除分  
門埋伏外親督百餘人大開東門一擁衝出伏兵齊應遙爲吶喊  
逆眾不知我兵多寡倉皇失措自相踐踏死者無數我兵乘其披  
靡截殺賊匪數百餘名生擒四名餘逆逃竄山後盤踞時已四更  
收隊回城至五鼓時賊復於城東隄埂之下開挖地道經城上知

覺未能轟發次日黎明臣親率馬步出城誘戰該逆分兩股包鈔我軍之後正在相持閒適總兵朱希廣等由閒道兼程趕到於距城十二里之穆家河遇賊開仗斃賊甚夥二十八日四營奮力衝擊往返數百合縱橫截殺約斃二千餘賊奪獲馬匹器械等件無算該逆卽於二十九日乘夜向西竄去城圍立解臣思捻逆猖獗異常必當勦洗淨盡當飛檄溫德勒克西所部馬隊迎頭截擊見在武關一帶力擊獲勝未使竄越復親督王萬年等三營跟蹤追殺兩路夾攻以期聚而殲旃見在粵捻巨股雖退出荆子關由浙川一路竄走惟又有捻匪數股竄至雙祿山距荆子關六十里臣聞信之下卽飭朱希廣等四營仍赴浙川一帶隨穆圖善相機防勦並飛咨穆圖善確切探明撤兵回駐荆子關斷不可使逆股復踞此處致我軍反成尾追之勢上諭議政王軍機大臣等捻首

姜台凌率領大股直犯商南多隆阿以少擊眾設伏用奇使大股逆捻痛受懲創足見膽識過人深堪嘉尚該將軍見已檄調溫德勒克西等迎頭截擊在武關一帶力戰獲勝未使竄越仍親督王萬年等營跟蹤追躡乘此聲威兩路夾攻諒不難殲除淨盡惟荊子關踞匪甫由淅川竄走復有捻匪數股竄至雙祿山多隆阿見飭朱希廣等隨同穆圖善相機防剿第各路巨匪同時並舉該將軍兵分力單深恐應接不暇著官文速飭道員梁作楫率勇會剿金國琛見在襄樊著卽迅飭就近選派兵勇馳赴淅川一帶策應俾穆圖善得以回顧荊子關不至爲逆匪所據洪貞謙已赴南陽自應就見有兵力迅將淅川回竄之匪痛加剿洗著鄭元善嚴飭該署司督率盧得盛等奮勇前進毋得以添兵助剿藉口遷延致干重咎雙祿山股匪係由何處竄至鄭元善何以又未派兵攔截



是否所派之兵與賊避道而行該撫爲所蒙蔽仍著鄭元善酌派兵勇迅速進剿儘任賊長驅蔓延鄰省惟該撫是問多隆阿一軍將來雕剿捻粵各匪兼顧楚豫等省邊防止可作爲游軍恐難久駐一處商南爲陝省衝要時有匪徒窺伺勝保責無旁貸並著隨時力籌防禦俾髮捻各匪不至闌入陝境方爲妥善將此由六百里各諭令知之○諭都興阿等嚴捕習教匪徒○調駐紮南苑馬隊六百餘名防守山西○增設黑龍江呼蘭副甲二百名筆帖式三員○壬辰諭議政王軍機大臣等直東交界地方馬賊橫行若不迅速剿除勢將釀成巨患著崇厚寶山迅飭派出之護總兵春霖等速赴直東交界地方會合各路兵勇實力搜捕務將桑園四女寺等處積年盜藪悉數殲除毋稍遲延將此諭令知之○僧格林沁奏前聞楚軍苗練彼此不睦會派弁前往蒙穎一帶探訪據

差弁周隆廷等先後回營稟稱苗沛霖歸正情形雖未能一律馴順見已願將壽州城垣正陽關釐卡交出除九營頭目潘四於五月投歸李續宜外其餘各處苗練仍歸苗沛霖調用苗沛霖屢懇蔣凝學向李續宜婉言並接據李續宜來咨亦與該弁稟稱相同似此情形苗沛霖尙可駕馭惟李續宜面見都司周隆廷時曾有苗沛霖叵測須用重兵防範之語固係慎重機宜但彼此懷疑則苗沛霖亦必不能帖然爲用爲今之計自宜恩威並行施以權術亦不必先與爭利業經臣札諭該練勦擒圖功俟賊平後苗沛霖其勢旣孤傲慢自必盡除矣惟蔣凝學帶勇五千餘名駐紮潁郡唐訓方見署撫篆勢難統籌全局刻下擒匪疊次潰敗勢將窮蹙若苗練妥帖合之楚軍由南進勦臣等督帶馬隊由北進兵可期得力至於鄭元善所統兵勇已赴豫省西路防勦恐難及時撤回

吳棠所部各隊見接來函以防守裏下河爲要恐難分撥毛昶熙各隊除帶赴省城外其駐紮營廓等處勇數無多亦屬有名無實儻楚軍苗練各不相下勢必彼此爭鬪合力除擒之舉難期迅速藏事臣見將管帶楚軍之蔣凝學是否堪以統帶抑或應添派提鎮大員督率及苗沛霖應如何駕馭暨督催楚軍進剿擒巢各情節咨行會國藩酌量調度仍應請旨飭下該大臣妥爲兼顧庶於剿擒大局可期有益 上諭僧格林沁奏追剿回竄敗匪進紮永城及苗沛霖見應駕馭情形各摺片業經明降諭旨將卓明阿等照所請獎敘矣其營總富和等由碭山追剿永城之薛家湖郭家樓等處殘匪沿途截殺殆盡僅餘擒首數名及零星從賊奔敗回巢所辦甚屬妥協僧格林沁見飭富和並添派之翼長全順會同恆齡卓明阿馬隊駐紮永城一俟永毫一帶積潦漸消道路可行

卽移柁機進剿亳州捻巢該捻等屢經痛剿一經直擣老巢勢必窮思竄走若令東西紛竄官軍移向各路往追賊又繞路回巢官兵又復回攻必致往來周折爲所牽掣總當豫爲籌畫謀定後動方免臨時互相推諉貽誤事機僧格林沁見在夏邑將由北路進兵堵來各路約齊會剿之時賊如竄往北路卽由該大臣撥兵追剿賊竄西路應由唐訓方撥兵追剿賊竄東路應由吳棠撥兵追剿賊若南竄卽三路合力追剿均著各專責成先期妥爲布置毋得臨事觀望遷延自干咎戾其毛昶熙所部駐紮營廓等處勇營並著僧格林沁酌量隨同官軍應由何路進攻妥爲調遣楚軍應由南路進攻其西路賊竄責令追剿是否足敷分撥唐訓方甫蒞皖軍於進兵情勢未知能否洞悉旣據僧格林沁將督催楚軍進剿捻巢各情移咨曾國藩卽著妥爲籌議並將紮駐潁郡楚軍

道員蔣凝學是否堪以統帶抑應添派得力提鎮大員督率之處一併妥籌兼顧吳棠駐軍清淮籌防裏下河一帶於亳州東路靈宿等處亦恐相距稍遠黃開榜派赴徐州代領田在田一軍應令如何酌量進紮袁甲三尙駐臨淮應與吳棠等如何各分汛地合力進攻之處均當豫爲籌定總之各路責成均須嚴密部勒方能及時同心勦力聲勢聯絡著該大臣等會同商酌盡善迅卽奏聞鄭元善見赴河洛督辦西路所統各軍雖難撤回助剿惟毫捻如由西北兩面竄走均係豫境著鄭元善毛昶熙嚴飭各屬文武官紳率領兵練協同官軍防剿如有賊由何路竄逸不能實力堵禦該地方官吏與帶兵將領厥罪惟均苗沛霖反覆再三其叵測情狀天下間知此次因僧格林沁札諭該練欲用之剿捻遂乘機具稟申訴揣其意一則欲借僧格林沁抑制李續宜撤去楚師一則

欲借勦擒之名冀僧格林沁奏准還其前此占踞之利藪一面之詞毫無情理而陰鷙之謀時流露於意言之表苗沛霖如果能帶練勦賊爲國出力朝廷屢經明諭賞其既往予以自新該大臣等何難待之坦白盡釋猜嫌但必須悔罪歸誠有殺賊攻城之實據方可加之信任若仍心迹闇昧或陽爲助勦而與賊陰相結納或冒官練之名以脅制民圩希圖煽惑朝廷亦必洞見肺肝諒該大臣等亦斷不以欲資其力稍涉遷就致爲所惑而忘後患著僧格林沁曾國藩等仍各悉心會同察度妥籌萬善正陽等處釐卡旣已交出該練等果能隨同勦賊曾國藩等並當籌給餉需至壽州正陽關等處利源所在斷不得令該練等藉詞餉需再圖侵占前次逆首陳玉城就擒壽州其驍悍之眾尙有二千餘人苗沛霖收隸所部見在曾否遣散其竄擾南陽一股擒逆有無此項餘黨並

著僧格林沁等查明具奏將此由六百里各諭令知之尋奏遵查  
苗沛霖所收陳逆餘黨因帶往江溝集剿捻遇髮逆馬仁和與捻  
合股遂逃歸馬逆隊內見畱苗沛霖處無幾其南陽竄匪未據各  
路稟報無從深悉報聞○諭僧格林沁奏苗練楚軍彼此不睦宜  
暫用駕馭並將給苗沛霖札諭及苗沛霖原稟咨送軍機處呈覽  
等語苗沛霖以懷遠生員充當練總蒙 文宗顯皇帝破格施恩  
擢任川北道加二品銜宜如何激發天良剿賊圖報乃有竊據城  
邑偏脅民圩慘殺紳練各情事卽生擒陳玉城亦因廬州兵勢眾  
盛是以縛獻渠魁並將陳玉城死黨二千餘人畱爲已用畏惡李  
續宜時思去楚軍以自便其實楚軍未曾與苗練打仗李續宜亦  
非一意主剿正陽關壽州皆國家疆土此時畏李續宜之威始行  
退出又豈能藉口居功詳閱原稟如粵逆送印加官封王贈女已

據供認不諱而該大臣札諭苗沛霖有楚軍如有尋覈之處可隨時稟報以憑覈辦等語設使該練無端捏造楚師尋覈前赴該大臣行營稟許必當採訪真確詳細權衡不可輕聽致蹈勝保前轍該大臣欲用苗練以勦捻自係慮苗練與捻眾句合更難著手惟該練陰鷙居心能否真心助順尙不可知此時附苗各圩已有數百處反正特恐苗沛霖得該大臣札諭復向各圩倡脅假公濟私亦不可不嚴爲防範要之苗沛霖之爲降爲叛總以勦捻之真假爲憑如果隨同僧格林沁力破捻巢不獨前罪盡寬並可加恩錄用然必須將所據城邑民圩盡行退出釐卡利源一一歸公伊但帶練隨勦覈其人數若干酌撥糧餉方爲妥善且俟苗沛霖覆稟果肯與僧格林沁約期見面再行酌量辦法袁甲三昨日所陳四條曾經錄寄該大臣所稱苗沛霖能唆令該大臣與楚師構釁及



窺破北路虛實皆屬意中之事該大臣定能先見及此該大臣公忠體國自無絲毫成見但左右之人不能盡如該大臣之存心恐營內辦事之員有受其賄屬貪利忘害代爲乞恩者亦須加意防維毋得爲所蒙蔽苗沛霖前依勝保以自固此時復思附僧格林沁以圖存該大臣能深明其底裏則用其力以剿賊亦可有益無損至將來進剿捻巢之時河南爲大營後路不可不慎之又慎前因南陽被圍鄭元善未能督兵救援徑回省垣辦理監臨事務當經諭令該撫於出關後卽行馳赴河洛實力剿辦旋經官文等派令道員金國琛剿辦南陽賊匪力解城圍多隆阿攻克荊子關曾未聞豫軍隨同剿辦髮捻各匪屢次由豫赴陝復由楚竄豫毫無遏堵卽如陳得才一股由豫穿行入陝復由陝回竄雖經鄭元善奏報各屬擊剿情形何以未有一處能行攔截是否空言搪塞毫

無豫備抑係地大兵單不敷分布又如楊長春楊飛熊李續燾皆屢經行陣之將頗著戰功此時何以並無功效是否鄭元善調度無方該將弁等不能樂爲之用僧格林沁近在夏邑著卽查明具奏毋稍徧徇苗沛霖一事本日寄諭該大臣等會剿捻匪業已言其大略因此事機宜較密有非事外人所能與聞者用再重言申明將此由六百里密諭知之○調察哈爾馬隊二百五十名赴僧格林沁軍營助剿○僧格林沁奏捻匪北竄力疾親往得旨覽奏倍深繫念該大臣惟當隨時調攝以副期望○癸巳諭議政王軍機大臣等韓超奏委署總兵人地未宜請旨辦理等語據稱貴州安義鎮總兵一缺經徐之銘委令儘先參將回教馬聯升署理並未與韓超等咨商馬聯升辦事如何韓超等未能深悉黔省軍務方殷恐有窒礙自係實在情形馬聯升旣於該省人地未宜卽著

徐之銘將該員撤回貴州地方雖係雲貴總督兼轄惟徐之銘籍隸貴州於該省地方公事尙未會銜何以此次並不會商韓超田興恕輒派員前往署理嗣後遇有該省武職總兵以下缺出由該署撫等就近酌量會委以期得力徐之銘毋庸揀派前往將此由五百里諭令知之○諭韓超等奏徐之銘委回教馬聯升署理黔省總兵並授意林自清前赴川黔等語本日已諭令徐之銘令將馬聯升撤署鎮篆改由韓超委員署理矣徐之銘見爲回人挾制恐其遷延不辦著潘鐸張亮基於到滇後卽行查明馬聯升撤委一事如徐之銘尙未辦理卽著潘鐸等將該員撤回滇省另行差委至林自清率眾入川一節前據徐之銘奏稱係林自清自行呈請見經韓超飭令鎮甯州地方傳詢林自清之父據稱接林自清家信內有係由徐之銘授意而行之語徐之銘兩次行文韓超始

則稱林自清赴川助剿未奉諭旨率行起程不受節制恐入黔擾累地方繼又稱貴州安南縣危急委林自清赴援前後自相矛盾是該撫之辦事乖謬奏報欺飾已可概見著潘鐸張亮基傳詢林自清是否該員自願赴川抑係徐之銘授意遣往據實覆奏將此由五百里各諭令知之○諭韓超田興恕奏黔省上下游辦理軍務情形一摺黔省羣盜如毛旋滅旋起據所奏稱上下游各府廳州縣有賊處所均經派撥兵弁分路剿辦因天柱銅仁一帶緊接桂疆疊經咨由湖南調派勁旅越境以剿爲防思州府知府陳運昌總辦下游團防著卽飭令會同楚軍合力兜剿田興恕疊經諭令帶兵前往四川交駱秉章差遣此時諒必早已奉到迅速起程韓超身任疆圻地方軍務責無旁貸沈洪富等帶兵將領向稱得力著卽督率各該員等及各地方文武將各路賊氛次第掃蕩各

省貴州協餉曾經照該署撫所請飭催韓超仍應設法將勸捐及釐卡一切派委妥員善爲經理以資接濟不得以餉絀兵疲藉詞延宕以爲卸責地步楚軍越剿收復之各地方黔省務當派委賢員妥爲綏輯其毗連境地如尚有賊氛未靖之處仍著會商毛鴻賓飭令楚省諸軍合力剿辦江忠義簡署貴州提督節經飭令迅速赴黔該員久歷戎行到黔後韓超將地方軍務與之商同辦理速靖邊隅貴州武職自總兵以下缺出卽准由韓超會同提督委署奏明辦理並已諭知徐之銘等欽遵林自清擁其練眾入川經由黔境經韓超飭令該地方文武堵截未容入境所辦尙安徐之銘在滇爲回眾及林自清等所脅辦理諸形荒謬滇黔交界處所甚多仍著韓超飭令各地方嚴爲防範毋任滇省匪徒潛謀窺覷肆行竄越將此由六百里諭令知之○命左都御史李棠階在軍

發大臣上行走○貴州安順狎匪平賞總兵官羅孝連提督銜○  
甲午諭內閣裴德俊奏牧令宜加體察等語所奏甚是州縣爲親  
民之官地方利弊民生疾苦全賴州縣爲之區畫方足以蘇民困  
而清吏治該州縣等均朝廷命官豈竟不知自愛甘犯貪污乃朝  
廷實加訪察而循良廉潔之吏仍少概見豈該州縣竟無天良不  
知愧奮總由徇弊未除欲勉爲廉潔而無由甚可憫念裴德俊所  
稱州縣命盜錢糧之解費差使節壽之應酬需用浩繁養廉旣已  
攤扣耗羨又復歸公勢必取諸民間均係實在情形自應悉行裁  
革俾州縣得以從容展布不至擾累小民從前湖北巡撫胡林翼  
裁革州縣一切浮費故吏治蒸蒸日上近日兩江總督曾國藩江  
西巡撫沈葆楨請裁革江西攤扣各款以清弊源洵能仰體朝廷  
澄清吏治之意實心辦理各直省自宜仿照舉行嗣後州縣解費

酬應等款均著永遠裁革除欽差兵差照例供應外其餘過往差使以及本省上司一概不准應酬違者以違制論其攤扣各款應如何酌量裁減並著妥籌具奏各直省大吏受恩優渥正可藉此自勵廉隅而州縣中稍知自愛者亦可勉爲循良以備朝廷任使儻仍敢肆行貪污必當按贓從嚴治罪經此次訓諭之後各直省大吏務當實力舉行勒限一年妥爲辦理儻別經發覺或經訪聞仍有收受節壽需索解費等弊必將該上司從重懲處毋謂言之不豫也將此通諭各直省督撫知之○命京控案件專責按察使訊鞫○調沈桂芬爲戶部左侍郎轉毛昶熙爲禮部左侍郎以龐鍾璐爲禮部右侍郎由內閣學士遷○乙未諭議政王軍機大臣等本日據恭親王等面呈崇厚致總理各國事務衙門信函內稱副將華爾於八月間進剿慈谿受傷身故見在所部常勝軍暫交部將白

齊文法思爾德接帶英國卻欲薦人尙在未定並據法國公使哥士耆函稱甯波與餘姚勢甚危急亟宜嚴加堵禦所有前已議准該國副將拉伯拉德在甯波管帶本兵並訓練中國兵丁請總理衙門行文李鴻章迅給憑札並令左宗棠轉飭甯波道將該處防務統交籌辦必可竭力部署各等語華爾以外洋歸誠之人既爲中國效力禦賊捐軀自應獎卹優加諒薛煥等必當奏請恩卹惟常勝軍必需幹練之員方可接管白齊文法思爾德確係何國之人是否勝任抑或徑用中國大員接管著薛煥李鴻章左宗棠妥爲籌商迅速辦理至崇厚函內有英國卻欲薦人之語而哥士耆又稱欲令法國副將拉伯拉德接辦甯波防務有無窒礙甯波上海會否令其訓練兵丁並著察覈具陳見飭令總理各國事務衙門與英法公使籌商如令該二國人帶兵必須如華爾之呈請歸



入中國版圖願受節制方可予以兵柄薛煥李鴻章亦著按照此  
意與在滬領事等官妥籌酌辦不可稍有拘泥致誤海防大局將  
此由六百里各諭令知之○諭總理各國事務衙門奏布路斯國  
公使到滬請派大員互換條約各摺片所有此次互換條約卽著  
派薛煥辦理薛煥等所稱該公使係屬領事不應徑用照會亦爲  
體制起見見經總理各國事務衙門擬先令於上海司道中酌派  
一員出名照覆卽由給與照會之司道與之換約儻該公使必欲  
索取全權大臣字樣薛煥卽援照與比利時國換約之例由薛煥  
擬給照會換約惟在薛煥與李鴻章相機籌辦諒該大臣等熟悉  
情形自能悉臻妥協也總理衙門片著鈔給閱看將此由六百里  
各諭令知之○詔京外薦舉人材○飭山西等省迅解京餉○定  
貴州黎平府屯田章程設守備千總各二把總四外委六分司管

帶另設屯守備二千總把總各一外委二屯長四十名專司屯糧  
丙申諭議政王軍機大臣等勝保奏武關等處髮捻各匪紛竄  
情形並請將黑龍江馬隊仍調赴陝等語見在髮捻各匪同時西  
竄窺伺武關西同鳳三府回匪未平設令髮捻各匪乘間闖入關  
內則內外交訕勦辦更形棘手著多隆阿督率所部迅將商州商  
南一帶屯聚賊匪痛加勦洗並令溫德勒克西等嚴扼武關毋任  
賊蹤竄入見在各股巨匪竄聚秦豫交界多隆阿務宜督飭所部  
相機勦辦妥行籌度毋令顧此失彼方爲妥善鄭元善前奏捻匪  
由靈寶閬鄉折竄永甯盧氏已派楊長春帶隊於宜永嵩伊各境  
邀截見在捻匪已竄至商雒一帶是豫軍邀截之說又成虛語該  
撫於本省軍務漫無布置又不認真督勦一味空言搪塞以致大  
股髮捻各匪同時紛聚商雒浙川一帶貽害本境流毒鄰封實堪

痛恨著卽迅飭楊長春馳赴商雒一帶會合楚軍速將匪股盡除並派兵分布各境以防回撲河陝毋再玩誤致干重譴勝保所留豫省之黑龍江三起官兵四百十五員名前經僧格林沁調赴歸德大營著僧格林沁仍將此起馬隊飭令營總音德善管帶前赴勝保營勝保之軍甚形單薄副都統祥恩一軍畱防壽州經勝保調赴陝西著袁甲三唐訓方另行派兵前赴壽州接替以便祥恩一軍起程赴陝將此由六百里各諭令知之○諭勝保奏咸陽官軍擊退圍撲營盤之大股回匪乘勢焚毀賊巢二處見仍催調後路各軍以資剿辦各摺片覽奏均悉陝西回匪撲擾省城雖經疊次剿殺而股數繁多蔓延十數州縣官軍從咸陽進剿賊以全力抗拒卽著勝保雷正綰督飭諸軍乘勝進剿飛飭畱防壽州之副都統祥恩項城之參將勝喜並駐紮陝州之副將王佐臣等各軍

迅速入陝以厚兵力而資調度賊雖大股西趨同朝等處濱河緊接晉疆仍應防賊回竄成明之軍在同朝一帶仍恐力單該大臣飭令前赴同州緊靠洛河擇要紮營尤恐距黃河較遠賊得乘閒鈔襲其後應如何添撥官兵俾資戰守均著勝保酌量辦理勝保候省城布置妥協後卽出省督剿毋稍稽延鳳邠等處毛震壽所派劉春堂一軍能否得力其陝甘兩省毗連處所恩麟會否將備調之兵酌撥扼要嚴防所派赴亭口華亭三水一帶官兵並著恩麟催令星速赴防勝保卽飭馬德昭馳往統帶力籌防剿郭刀刀股匪攻陷甄坪廳前經諭令飭毛震壽等實力堵禦毋任得與洋縣之賊勾結仍遵前旨飛催督率兵團嚴密堵截陝省剿回正當喫緊其後路髮捻尤須豫籌堵截毋令續行入陝勾結剿辦更形棘手該大臣仍應隨時偵備與多隆阿等聯絡策應毋稍疏虞將

此由六百里諭知勝保雷正綰並傳諭恩麟知之○命倭仁爲大

學士以文祥爲工部尙書

由左都御史遷

○丁酉諭內閣前因上海已革

副將馮日坤有縱兵通賊等情疊經諭令曾國藩李鴻章嚴密查辦茲據奏稱已革副將馮日坤由鎮江調赴上海以辦理內應爲名與蘇賊李紹熙句通接濟咸豐十一年十一月該革員由上海私運洋槍火藥等項往蘇濟賊經提督曾秉忠盤獲又上年五月賊撲松江該革員縱勇乘亂搶劫所部兵勇二千名並不足數支領糧餉多係侵吞經李鴻章飭令來營聽候查辦該革員復乘間脫逃當經派員拏獲卽於軍前正法等語已革副將馮日坤以帶勇武員輒敢通賊濟匪冒餉殃民迨經李鴻章飭令來營聽候查辦復膽敢屢次逃匿李鴻章將該革員拏獲卽在軍前正法辦理甚爲妥協嗣後軍營帶勇員弁如有縱勇擾民暨冒餉通賊情事

卽著按照軍法從事毋稍姑容○以載齡爲左都御史轉基溥爲

吏部左侍郎調載崇爲吏部右侍郎恆祺爲刑部右侍郎以慶明

爲理藩院右侍郎

山內閣學士遷

○予江蘇傷亡同知韓正國祭葬世職

入祀昭忠祠○予浙江殉父幼童福建道員趙景賢子深彥旌卹

加等○戊戌多隆阿奏據探擒逆前隊直抵武關總兵陶茂林及

溫德勒克西馬隊在彼力竭未便竄越賊之後隊尙在山後一路

陸續繼進又據穆圖善報稱日前竄至雙祿山之股匪亦向西平

一路西趨想係歸併姜逆大股而去

臣

卽令穆圖善畱三成隊守

營以七成隊星夜折回飭金順等馬隊駐守荊子關初二日

臣親

督總兵王萬年等排隊誘戰牽制賊勢以鬆武關之力竟日殺賊

千計武關一路亦殺賊三百餘名初三日五更出隊賊匪羅布十

餘里我軍分路進攻剿賊眾抵拒不動

臣

復親督王萬年之軍繞

至賊後蠡擁衝入擊殺甚夥賊始驚潰初四日穆圖善統率步隊  
趕到商南面商布置臣先帶親兵在離城十五里之捉馬溝修築  
營壘西刻壘成是夜該逆大股暗伏山腰以數股圍撲我營臣傳  
令各營候其撲近以排槍擊之穆圖善帶隊行至捉馬溝小口排  
隊而入近賊伏處開放槍礮一擁直上殺聲震天逆眾大亂東奔  
西突有自相踐害者有墜入山塹者有被我兵擊殺者有落水淹  
斃者平明一望徧處皆是賊屍此時賊眾自捉馬溝起至武關止  
綿亙五十餘里蠡擁蟻聚仍有四五萬眾其勢洶洶當派總兵趙  
既發等奮勇追擊臣親督總兵余福象居中策應斬擒甚夥當將  
生擒之賊帶至陣前令其指認賊目據云紅邊白旗爲姜台凌黃  
邊紅旗爲王懷義黃邊藍旗爲周老明黃方旗爲韓老萬黑方旗  
爲張小明尖白旗係孫老危其各色小旗均係小頭目不知姓名

日前姜台凌曾遣小賊頭領數千人走盧氏一帶迎張落刑殺匪  
見在不知何往賊中最狠者爲站隊居中之紅邊白旗黃邊紅旗  
兩股只要將其打退餘賊皆無能爲等語趕卽傳知各軍先衝賊  
之中隊該逆等迎前抗拒鏖戰五六十合不分勝負臣與穆圖善  
等督率親兵從山旁繞至賊背出其不意搶上山梁大呼殺賊賊  
始驚慌隊亂旗靡我兵乘勢衝殺刀矛槍礮齊施斃賊不下萬計  
生擒五百餘賊卽行正法奪獲牲畜五千有奇敗匪勢如山倒我  
軍占住高岡初六日乘勝出隊各士卒勇氣百倍愈殺愈奮該逆  
將器械盡棄坐以待斃不敢回手各營且殺且進武關全軍亦來  
合兵一處前後夾擊殺賊更夥奪獲生畜器械無算所賸馬步殘  
賊已不及萬是夜三更拌命翻山而走臣料其必由來路回竄爰  
於初七日五鼓整隊先發追至三角池及賊尾隊痛加剿戮初八



日直抵西平將賊之全隊截住縱橫迎殺伏屍四十餘里血流成渠竟將醜類盡殲惟此間重疊山嶺易於藏奸當經飛檄副都統金順等馬隊由荊子關馳赴西平沿途搜捕並飛咨河南撫臣鄭元善通飭地方文武遇有扮作難民結黨逃回之賊卽行截殺毋任稽誅 上諭內閣多隆阿奏官軍剿滅毫穎西竄擒匪見派馬隊接捕遺孽一摺多隆阿調度有方旬日間卽將巨寇剿除殊堪嘉尚著加恩賞給黃馬褂一件大卷江綢袍料二件大荷包一對小荷包兩箇白玉四喜搬指一箇白玉柄小刀一把交多隆阿祇領以示優異○李鴻章奏八月中旬署甯紹台道史致謬由皖來滬正與臣籌商軍餉事宜據甯波府知府林鈞稟報叛兵勾引髮逆攻撲姚城雖經擊退恐該逆更圖旁竄該道隨於二十三日與副將華爾同坐輪船駛往甯郡旋據史致謬稟稱賊匪大股勾結

屬匪於八月二十五日突入慈谿縣城當商同華爾將駐守姚邑  
之勇抽調數百名來甯幫同保護續據蘇松太道吳煦稟稱華爾  
於抵甯後聞慈谿復失卽於二十六日督帶常勝軍駛至半浦距  
慈谿二十餘里由陸路進兵二十七日親赴城下率眾登城該副  
將在後督隊不期賊從城上放槍適中華爾胸腕登時暈倒通事  
扶救回船其時派令登城之常勝軍已一擁冒煙直上賊匪紛紛  
潰敗我兵擒斬甚眾立將慈谿縣城克復華爾受傷回船自知不  
救飛棹回郡因慈谿守兵太單復指調防甯之常勝軍二百六十  
名馳赴防守二十八日華爾傷重殞命各等情查甯波正值喫緊  
常勝軍未便遣散華爾遺言擬暫交白齊文法恩爾得會同管帶  
相應奏明請旨定奪再副將華爾係美國部落鉗要人咸豐十年  
經吳煦雇令管帶印度兵隨攻嘉定太倉並兩次攻克松江府城

旋據稟願隸中國版圖吳煦請令管帶常勝軍協守松江本年正月率五百人破賊十餘萬於松江之迎禧濱天馬山等以少勝多功績最奇復懲匪英法二國之兵攻毀高橋等處賊壘蒙恩施以副將補用自下抵滬受事該副將頗遵訓遣屢次派令會勦金山衛城進攻劉河逆匪所向克捷又奮力攻克青浦並有力圍掃蕩蘇城賊匪之議似此忠勇性成難能可貴臣已督令吳煦等改爲中國冠裳易棺收殮葬於松江以全其效命中朝之志華爾於松江甯波戰功尤著此次攻克慈谿中槍殞命可嘉可憫懇恩飭部從優議卹並於甯波松江兩處建立專祠以慰忠魂 上諭李鴻章奏浙江逆匪攻陷慈谿華爾聞信卽管帶常勝軍進剿指揮兵勇登城賊從城上放槍適中華爾胸腕子從背出登時暈倒當經所帶常勝軍將慈谿縣城克復華爾回甯波後於次日殞命等

語覽奏實深嘉憫洵屬義勇性成無忝戎行見經李鴻章已飭吳  
煦等妥爲殮葬並著於甯波松江兩府建立專祠仍交部從優議  
卹以慰忠魂○左宗棠奏逆賊李侍賢自遂安擊敗後復糾合金  
華悍賊於南岸湖鎮羅埠北岸蘭谿縣屬之永昌鎮太平祝家孟  
塘油埠裘家堰等處屯踞意在俟官軍深入卽乘虛襲我後路臣  
當飭劉培元等軍於龍游城北對河之蒸圩地方駐紮臣率親兵駐離城  
十五里之譚石望地方爲兩路策應另檄臬司劉典率馬步十一  
營駐龍游屬之高橋專事截剿援賊七月十六日各營行至東門  
橋適侍逆李侍賢率賊千餘前來探路楊鼎勳等率所部闌橋截  
擊互有殺傷賊見我軍後隊踵至始行遁走十七日我軍進攻油  
埠賊巢劉典等分路進兵賊欲從旁來鈔經楊鼎勳等突出擊之

遂皆奪路狂奔我軍三路齊進追殺十餘里其斃長髮悍逆千數  
百名生擒百餘名陣斬鄧積仕等賊目數十名該逆自油埠擊敗  
後退踞太平祝家裏家堰孟塘等處勾結自固二十一至二十四  
等日劉典率各營分兩路進剿其由右路進者先燒毀賊巢五處  
直撲裴家堰賊巢壘已垂破忽後路援賊麤至李良平身受礮傷  
賊仍退併入壘其由左路進者行近孟塘賊分數路抗拒李耀南  
率所部當先衝殺楊鼎勳繼之鏖戰兩時斃執旗賊目數名賊勢  
少卻忽另股從左右兩路鈔來楊昌濬一面分軍堵禦一面令楊  
鼎勳督隊向前正鏖戰間各軍星速馳援賊乃潰退我軍亦收隊  
而還臣查太平祝家等處與南岸羅埠湖鎮之賊相爲犄角意在  
死守金華蘭湯諸城以阻我軍進攻之路臣軍戰船尚未造齊不  
能扼截金華河路尙難制賊死命侍逆李侍賢屢經剿敗兇燄已

袁近以金陵首逆屢召赴援因臣軍苦於相持未能猝脫如蔣益  
澧一軍旬日內趕到必可痛予殲除臣之一軍因疫病故者甚多  
每次接仗不能派六成之隊而各路賊黨方源源而來不得不慎  
以圖之又奏溫台處之賊盡聚金華一郡逆首李侍賢挑其悍黨  
屯踞蘭谿屬之油埠等處近日因與廣東賊不睦令其分踞嚴郡  
昨又嗾新到之賊分踞壽昌近城各鄉賊蹤偏重北路李侍賢詭  
計似阻我師進攻金華而覓路竄皖南以赴金陵賊渠之召臣已  
密致會國藩豫飭徽甯守將嚴爲扼截並飭卽選道王文瑞等扼  
守遂安一路以撓其謀一面飛催蔣益澧督率所部星速赴浙以  
便分道截剿蔣益澧聞於八月初二日自長沙啟行其前隊此時  
計抵廣信臣飛飭其速進常山聽候調遣 上諭議政王軍機大  
臣等前因恭親王等面呈崇厚信函內稱華爾受傷殞命等情當

經諭知薛煥李鴻章左宗棠妥籌覈辦常勝軍素稱得力第前據薛煥等奏稱募足三千名何以此次畱駐松江者有四千五百餘名是此軍爲數不少白齊文能否勝任恐稍涉遷就徒糜餉項不如交中國大員管帶易爲駕馭或一時無此勝任之員仍須暫交白齊文接統著薛煥李鴻章悉心察度毋貽後患至英國提督欲派兵頭接管亦必如華爾之歸中國版圖受我節制方可允行法國武官接帶常勝軍一事其議已寢其所練甯波兵勇須與該國武官議明令其暫時管帶聽中國調遣所有籌防事宜准其會同商辦仍須聽地方官主持均著薛煥李鴻章遵照體察相機籌辦甯波爲沿海要郡慈谿雖復而兵力甚單該郡防守情形仍形喫緊左宗棠務當隨時妥籌李鴻章亦當不分畛域力籌兼顧本日據左宗棠奏稱逆賊死守金華諸城以阻官軍進攻之路該撫戰

船尙未造齊未能制賊死命該逆被金陵洪逆召援因官軍苦與相持未能猝脫並稱李逆挑其悍黨屯踞蘭谿屬之油埠等處近與廣東賊不睦令其分踞嚴郡又喉新到之賊分踞壽昌似阻我師進攻金華而覓路竄皖南以赴金陵已密致會國藩豫防徽甯並飭王文瑞等嚴扼遂安飛催蔣益澧星馳赴浙各等語所籌甚中竊要李逆圖赴金陵久有此計徽甯爲金陵上游若復被賊竄入則非獨金陵大營掣動卽安慶亦復戒嚴諒會國藩早已籌畫嚴飭守將妥密防堵蔣益澧前隊計抵廣信而該藩司何以如此遲滯著卽飛札催調剋期赴浙儻再不能以速補遲卽行從嚴參處以肅軍律左宗棠營內近爲疾疫所苦病弱物故者多覽奏實深馳系該將士征役勞苦至於如此甚爲憫惻著卽妥爲拊循毋令失所鮑超營內並金陵徽防各營近來疫氣已否平安軫念實



深甯國關緊緊要鮑超務當妥爲防範著曾國藩迅速傳知其廣  
德州情形見在若何並著查明具奏以慰廑念將此由六百里各  
諭令知之○諭多隆阿奏官軍剿滅毫潁捻匪見派馬隊搜捕遺  
孽一招捻匪糾黨五六萬人西竄希圖入陝勾結回匪經多隆阿  
督飭各軍剿除殆盡以少勝多可云奇捷惟捻首姜台凌王懷義  
周老明韓老萬張小明孫老危等是否均已殲斃抑或改裝潛逃  
仍著該將軍嚴密查明務期淨絕根株毋令餘燼復燃致貽後患  
多隆阿見擬移軍楚豫之交將粵逆陳得才大股乘機痛洗具見  
奮勉圖功不遺餘力惟回匪蔓延陝省勢甚披猖勝保雷正綰所  
部兵力尙不甚厚恐難廓清陝境多隆阿素顧大局能否分兵入  
關助剿抑或俟剪滅陳得才後再行遵照前旨統率全軍馳赴渭  
河以南剿辦該將軍久歷戎行必能權衡緩急妥爲辦理多隆阿

自肅郡拔營以來力疾督師忠盡可嘉見在病尙未痊務當妥爲調劑以慰廑念既據奏稱穆圖善在營一切藉資襄助卽著該副都統暫緩赴任以期得力將此由六百里諭令知之○諭此次毫穎擒匪併力西趨經多隆阿督兵迎剿出奇制勝竟將數萬巨捻一鼓蕩平不特豫楚邊境可安卽勝保一軍亦無腹背受敵之慮實爲近日北省軍務一大轉機勝保督辦陝西軍務責無旁貸此時既無後顧之憂卽著懷遵前旨迅速出省督率各軍實力剿洗回匪務使關中重地速就綏謐並須兼顧同朝一帶力杜其竄擾晉疆之路毋得安坐省城致干咎戾多隆阿另片奏武關爲東南第一要隘青山營守備馬斌帶兵三百人紮於關北山頂民寨爲避賊計商州營守備李雲帶八百人紮於關外賊離武關尙十數里而李雲一軍已棄械西逃經總兵陶茂林再三苦畱不顧而去

多隆阿初抵商南時聞百姓僉稱春間賊至副將閻丕敏畏賊撲城潛以鉛子火藥送賊等情尚未深信今觀李雲情形始信百姓所稱洵非虛假等語馬斌舍關登寨其心已不可問而李雲統帶多人聞警先逃惟怯無能實屬可惡馬斌李雲均著卽行革職交勝保雷正綰密速查拏審明棄險不守情形據實具奏並一面按照軍法從嚴懲辦至閻丕敏以武職大員不能力守要隘縱賊入險復敢以鉛子火藥媚賊求生喪心昧良至於此極前諭瑛榮繪圖呈覽閻丕敏營盤係紮西安城外東關該處兩次爲回匪攻撲勝保等奏報從未提及該員接仗情形是閻丕敏怯懦債事更難望其愧奮實爲法所難宥不可一日姑容著勝保雷正綰卽將閻丕敏提至軍前傳旨卽行正法以肅軍令將此由六百里諭令知之○諭武闡夙稱天險該將弁等輒敢棄險不守實屬可惡已有

旨將馬斌李雲革職交勝保雷正綰嚴拏審擬按照軍法懲辦其  
閻丕敏一員情罪尤重已命勝保等傳旨正法惟閻丕敏前經瑛  
棨保奏稱爲將材其人諂媚取巧已可概見此次難保不營求苟  
免儻勝保等敢徇情請託思爲閻丕敏乞恩並不將李雲嚴拏務  
獲又或於審明後力爲開脫均著愛仁王茂蔭查明據實參奏將  
此由五百里密諭知之○諭左宗棠奏訪聞已革甯紹台道張景  
渠重貲寄頓有籍隸廣東之浙江候補通判鄭壽南於上年雇坐  
火輪船同張景渠家人載銀數十萬兩運赴廣東香港地方並聞  
其銀亦非張景渠一人所有請查傳鄭壽南嚴訊確情等語張景  
渠既有家人同船護送則香港地方必有該革員寄頓無疑惟香  
港地方見隸英國該革員若寄頓貲財必與英國商人暗地勾通  
若非派委妥員善爲辦理必致別滋事端著晏端書勞崇光密傳

鄭壽南到案研訊確情卽派委妥員設法詳慎查辦不可稍有不實不盡亦不致英國人另生枝節方爲妥善原片著鈔給閱看再維惇衍片奏已革廣東遊擊章昇曜卽章順與降賊陶八陶二同惡相濟陶八陶二均經正法該革員罪同一律請一併正法等語章昇曜卽章順倚勢橫行無惡不作豈容倖逃法網著晏端書將該革員嚴行訊明卽交勞崇光就地正法以快人心原片並著鈔給閱看將此由五百里各諭令知之○已亥以全慶爲內閣學士

由大理寺卿遷

○以前署貴州巡撫江忠義署貴州提督○兵部奏整頓

馬政章程○庚子諭議政王軍機大臣等恭親王等奏籌議法國

派兵防守甯波海口鈔錄法國照會呈覽並權宜辦理各緣由等

摺片法國因美國華爾隸歸中國屢立戰功疊荷褒獎以爲榮耀

見值甯波海口喫緊願將伊國副將勒伯勒束權受中國職任帶

兵防剿願爲中國出力以敦和好且據該國照會內有甯紹紳士公呈甯波道移知上海道轉請法國卽派勒伯勒東前赴甯郡籌辦防守等情自應俯順輿情以資守禦惟用外國之兵剿賊必須聽受中國節制其所保守地方仍應中國主持見由總理各國事務衙門與之定議該國情願以勒伯勒東權受中國職任聽浙江巡撫及甯波道節制著薛煥李鴻章左宗棠將該副將在甯波所練中國兵丁一千五百名應給餉項卽行支放並據恭親王等奏稱以該副將旣歸該省大員節制卽應由該大臣巡撫給付札憑以一事權卽著薛煥李鴻章左宗棠等悉心妥籌或由李鴻章或由左宗棠發給勒伯勒東札付旣須事權歸一又須力能控制方免紛歧遲誤該副將旣受中國職任之後卽應一視同仁遇事持平辦理一切按照中國法制不得稍存偏倚亦不得稍有寬縱以

肅軍律史致謬甫到甯郡未知於該處情形及駕馭事宜能否諳悉薛煥等務卽督飭該道於該副將所領之軍及甯郡兵勇賞功罰罪以及稟報戢守各情務令稟公覈實其支放錢糧尤不得有扣減浮冒等弊至籌防一節先經法國公使欲統歸勒伯勒東辦理復經總理各國事務衙門與之講論歸甯波道督辦如該副將有所籌商務飭該道員與之和衷共濟不得稍有齟齬致誤機宜一俟左宗棠等克復金華兵力足以兼顧甯波卽行察看情形仍用中國官兵防守原摺片著鈔給閱看將此由六百里各諭令知之○諭前據韓超田興恕奏稱查明馬如龍未能誠心就撫並欲阻潘鐸等入滇稟請減從前往等語當經諭令該署督等詳細斟酌不可墮其術中茲據張亮基奏雲南撫局難信官吏乘勢爲奸並安撫何有保駕馭林自清各摺片覽奏均悉徐之銘專權擅殺

久存跋扈之心欲令潘鐸等撤出兵練赴滇與韓超等前奏馬如龍稟詞大略相同見在滇回盤踞省城黨與日眾徐之銘復乘勢蠱惑已成固結莫解之勢該署督等若竟遲疑不進則省回之勢益固徐之銘益得藉以逞其奸謀潘鐸等見擬先至昭通東川等處察看民情向背相機辦理自係爲慎重起見惟昭通東川一帶漢回較省中情形尙稍恬靜如果加意開導諒可相安無事卽省中良回亦可漸釋疑慮固不可存輕進之心亦不可存畏難之見逐漸進步前抵省垣一面將漢回安撫事宜相機妥辦一面將徐之銘等劣款嚴行查究以肅紀綱何有保擁眾久踞馬龍州城張亮基自應先安其心俟抵省後再將戕害鄧爾恆一案質審務須究出指使及下手真正兇犯知縣許正裕等二員被殺據林自清稱係徐之銘誣陷見在知州志斌又有被戕之事著潘鐸等一併



嚴查懲辦林自清人尙勇往張亮基所請將該總兵並所部親兵  
四百名留川調遣妥爲駕馭之處著咨商駱秉章辦理將此由六  
百里各諭令知之○諭張亮基奏縷陳雲南撫藩跋扈情形各摺  
片覽奏均悉徐之銘等前此欲阻張亮基入滇藉詞如帶兵練恐  
致激變又云任其大興大革三年若不富强敢當軍令各等語種  
種狂悖叵測殊出情理之外徐之銘係張亮基所保據奏不難請  
旨明正其罪惟未敢發之太驟係屬實情張亮基在滇有年馬如  
龍等諒能信服著卽迅速取道入滇設法安撫以孤徐之銘等之  
勢徐之銘罪惡貫盈張亮基等入滇以後如有機可乘著一面奏  
聞一面正法勿涉拘泥勿稍寬容其一切操縱機宜並著駱秉章  
會同密商妥辦將此由六百里各密諭知之○命各省新潛徵收  
本色○諭廣東籌銀四十萬兩採買京倉米石○辛丑會國藩奏

皖北形勢以淮水爲綱領前此髮匪盛於淮南捻匪擾於淮北袁  
甲三駐紮臨淮跨兩淮而處其中頃大江以北長淮以南業已肅  
清然唐訓方暫署皖撫仍應駐紮臨淮以資控制西可聯絡蔣凝  
學壽穎之師東可聯絡吳棠清江之師南可聯絡石清吉廬州之  
師李世忠滁州之師卽北路亦可稍助僧格林沁之聲援若不駐  
臨淮則中段空虛恐徐宿蒙亳各捻又將窺伺淮南關繫甚大不  
可不防聞唐訓方定於閏八月中旬由鄂啟程來皖俟其到省臣  
當與之熟商接統袁甲三之軍汰弱留強與楚軍聯爲一氣庶可  
防剿兼施又奏大江南岸各軍疾疫盛行甯國所屬最盛金陵次  
之徽州衢州次之水師及上海蕪湖各軍皆疫癘繁興死亡相繼  
鮑超一軍見病者六千六百七十人其已死者數千尙未查得確  
數甯國府城內外屍骸狼藉無人收埋病者無人傳藥甚至一柵

之內無人炊爨軍中著名猛將如黃慶伍華瀚等先後物故鮑超亦染病甚重張運蘭一軍駐紮太平旌德等處病者尤多卽求一繕稟之書識送信之夫役亦難其人張運蘭送其弟之櫬至祁門亦自患病尙難回營楊岳斌自揚州歸來亦抱重病天降大戾近世罕聞惡耗頻來心膽俱碎設有大股賊匪撲犯甯國旌太等處鮑超張運蘭兩軍不特不能出隊迎戰並不能堅守城壘若撲犯金陵徽州亦深恐病者太多戰守皆無把握皖南藩籬一壞則江西內地空虛毫無足恃袁甲三李續宜皆將回籍唐訓方新來諸事且萃於臣一人之身臣自揣薄德不足以挽厄運菲材不足以支危局合無籲懇天恩簡派在京親信大臣馳赴大江以南與臣會辦諸務臣亦竭力經營以期補救於萬一上諭議政王軍機大臣等會國藩奏李元度一軍旣在新昌奉新等處並未打仗

單開請獎各員著無庸議並著會國藩飭令李桓遵照辦理大江  
南岸各軍疾疫盛行前據該大臣奏到時卽深軫念曾經寄諭進  
攻金陵不必急求速效惟求有以自立傷亡戰士並須加意拊循  
茲據奏稱近日秋氣已深而疫病未息各軍死亡相繼猛將如黃  
慶伍華瀚等先後物故鮑超與張運蘭楊岳斌等均各抱病軍中  
甚至炊爨寥寥覽奏情形尤深廕念此時戰守均無把握自屬實  
在情形惟據奏懇請由京簡派親信大臣前往會辦以分責任之  
重大挽氣數之艱難諒該大臣亦爲憂勞焦灼所迫朝廷信用楚  
軍以會國藩忠勇發於至誠推心置腹倚以挽救東南全局自諸  
軍進徧金陵逆匪老巢已成阱檻惟以艱難時會誠不易得疊經  
寄諭總以毋徒求效旦夕惟當立足不敗之地以竢可乘之機矧  
茲疾疫繁興各軍將士疲病之餘詎忍重加督責該大臣惟宜愈

矢忠誠加意拊循各營將士其傳旨優加存問當此艱危時勢益以疾疫流行將士摧折此無可如何之事非該大臣一人之咎意者朝廷政事多有闕失上千天和惟有齊心默禱以祈 上蒼眷佑我君臣當痛自刻責實力實心勉圖禳救之方爲民請命以冀天心轉移事機就順至天災流行賊中豈獨無傳染想該大臣鬱憤之餘未遑探詢刻下京中固無可派之人環顧中外才力氣量如曾國藩者一時亦實難其選諒該大臣素嘗學問尤當任以毅力矢以小心不容一息少懈也將此諭令知之○諭袁甲三奏病體支離勢難支持軍務一切原倚伊子袁保恆左右維持今袁保恆復聞計丁母憂亟須奔喪請催唐訓方迅速來臨並先令馬新貽暫統臨軍等語自屬實在情形著卽將臨淮軍務暫交馬新貽統率以重防剿而定兵心袁甲三俟馬新貽到後布置稍定准其

帶同袁保恆起程回籍調理會國藩於皖北軍務仍應妥籌兼顧  
督飭馬新貽認真料理此時唐訓方已自鄂起程著卽星速前往  
將此由六百里諭知會國藩袁甲三唐訓方並傳諭馬新貽知之  
○諭景綸等嚴緝吉林盜匪○命五城先期一月開廠煮賑○壬  
寅諭內閣韓超等奏攻破玉華山賊巢並會克天柱縣城一招八  
月初二初六等日玉華賊匪出巢竄至桐子坡等處經總兵沈洪  
富等分隊往攻斬馘甚多將賊營二十四座悉行蹋毀並攻拔賊  
卡三十七道卽將玉華山賊巢攻破其盤踞瓦寨之苗匪經知府  
陳運昌等會同湖南副將熊興伯等軍分路進攻沿途攻破賊卡  
奮力衝殺斃賊無算立將瓦寨收復其天柱縣城已由把總吳開  
相等會合總兵趙福元等克復賊匪向漢寨奔竄剿辦尙屬得手  
仍著韓超等督飭將弁會合楚軍將境內伏莽剿滅淨盡並將竄

踞漢寨之賊乘勝殲除毋畱餘孽○都興阿奏接會國荃函稱近日所部勇丁因病物故者不少鮑超軍中病者亦多恐兩月之內尙難拔營見聞侍忠兩酋約集來援金陵已蠢蠢欲動屬爲請旨飭多隆阿迅速東來渡江會剿等情察其來函詞意甚爲迫切可否飭下多隆阿督兵東下會攻金陵以資厚集 上諭議政王軍機大臣等江南布置情形既據黃彬等撥船防範卽飭該將弁等妥爲防剿毋稍疏虞忠逆等調賊數萬圖犯我軍並添造礮船冀擾江防尤應認真防堵著嚴飭遊擊胡世英申明紀律聯絡居民以壯聲勢會國荃大營疾疫甚多昨據會國藩奏到情形深爲軫念多隆阿見在馳赴楚豫之交剿辦陳德才股匪必得湖北另有一支勁旅以剿爲防方可飭令多隆阿東行本日已諭知官文安籌辦理該將軍卽函致會國荃令其勉力拊循用維大局將此由

六百里諭令知之○諭都興阿奏會國荃近日所部勇丁因病物故者不少鮑超軍中病者亦多見聞侍忠兩逆約集來援金陵已蠢蠢欲動等語江南情形萬分喫緊有必須多隆阿一軍前往助剿之勢而多隆阿尙爲陝豫邊防牽掣必須接替有人方能統兵東下鄂省文武員弁知兵者不少如金國琛梁作楫何紹彩等均屢著戰功著官文察看情形有能接替多隆阿者卽飭令統帶兵勇馳赴楚豫之交會同豫省將弁迅將陳得才一股併力殄除並駐軍楚豫邊境堵截入陝捻匪俾多隆阿得以統領全軍徑赴江南會合會國荃之師進圖金陵官文多隆阿忠誠體國諒必能移緩就急無誤事機將此由六百里諭令知之○命富明阿馳赴揚州幫辦都興阿軍務○癸卯諭內閣官文等奏迅解光化城圍及河口市鎮肅清一招南陽髮逆糾集捻黨圍撲湖北光化縣城竄



擾老河口市鎮蔓延甚廣經官文等豫派總兵成得升等會督水陸各軍併力夾擊賊眾潰敗督隊壓追城圍遂解乘勝連夜進剿老河口賊營乘賊不備揮兵齊進賊眾驚竄追殺二十餘里餘匪向襄樊一帶敗逃河口市鎮一律肅清仍著官文等飭令各將弁探賊所向實力堵剿迅掃逆氛毋任滋蔓○諭議政王軍機大臣等鄭元善奏粵逆紛竄唐鄧捻股紛駛內鄉見在相機力剿毛昶熙奏省防較鬆帶兵馳回宋營隨同僧格林沁進剿蒙亳各一摺覽奏均悉粵逆僞扶王等分股竄擾鄧州新野等處鄭元善督飭洪貞謙等帶兵追蹙該逆竄向棗隨一帶其捻匪姜台凌等股經多隆阿於商南擊敗後竄及內鄉另股竄過盧氏朱陽關楊長春督隊進剿雖有斬擒而山路崎嶇亟宜厚集兵力四面兜剿以期殲蕪無遺鄭元善身膺重寄豈得以地廣兵單餉糈支絀藉詞推

誘著卽嚴飭洪貞謙楊長春等軍認真攻剿務將此股竄匪悉數殲除如再不振刷精神迅殲醜類定將該員弁等從重治罪該撫立予嚴譴毛昶熙督辦河南團練責有攸歸豫省糜爛至此該侍郎豈竟毫無策應著卽激勵各屬鄉團沿途截殺以輔兵力所不逮毋得以進攻蒙亳遂置本省應剿之賊於不顧據鄭元善奏該匪如被剿情急勢必東駛回巢著僧格林沁探明賊蹤所向派撥馬隊相機截剿毋令竄越據官文等奏髮逆由浙川一帶竄近襄樊見在派兵迎剿鄭元善已飭洪貞謙扼紮唐鄧交界以防回竄卽著遴派勁兵交洪貞謙馳赴楚境合力攻剿不得株守交界處所致誤事機汴城防務已賴毛昶熙自應回宋惟前據僧格林沁奏宋營各隊分紮於營廓等處亦屬有名無實是宋營弁勇不甚得力該營業歸僧格林沁調度並著該親王隨時整飭俾成有用

之師豫省餉需萬分支絀該侍郎目擊時艱尤當汰除老弱挑選精銳務令悉成勁旅餉不虛糜方爲不負委任鄭元善另片奏陳逆糾合張佩林等股匪圖援陳寨經張曜督隊迎擊獲勝等語見在秋令已深汝郡一帶積潦諒已消涸著鄭元善速飭張曜督率汝防各軍盡力攻剿毋令逆首陳大濤突圍逃逸是爲至要將此由六百里諭令知之○諭勝保奏遵覆實在情形並回民起釁根由見在具呈乞撫及捻逆退出陝境各摺片覽奏均悉前因涇陽被圍同朝喫重諭令該大臣迅速督兵出省進剿茲據奏稱擬於閏八月內馳赴東路調度諒必酌度情形恪遵前旨馳赴同朝一帶實力攻剿不得再涉延緩所畱項城馬步兵勇四千餘名催調入關以厚兵力咸陽等處雷正綰疊次獲勝卽責成該提督辦理俾東西兩路分投進剿回匪不暇援救較易得手所陳回漢猜疑

激變各情朝廷早已聞知第回匪挾此間隙遽肆鴟張焚掠村堡至二千餘處是啟釁之由漢民不能無過而叛逆之罪實在焉回必得痛加懲創方可剿撫兼施此時斷不准輕於議撫致撤兵之後仍萌叛志且其遞稟成明旋即攻撲營壘可爲前鑒至各處良回本係朝廷赤子仍應妥爲安撫不得稍存歧視漢民雖多浮動第被此慘劫尤當加意拊循另片奏藩司吳春煥等坐擁厚貲膜視軍務請勒限捐餉等語均著照所議辦理第吳春煥王承基以藩臬大員官聲甚劣卽勒捐示罰尙屬權宜之計而高景清係本地紳士不肯竭力捐輸卽請旨嚴查追繳恐該省富民聞風畏懼致失人心且恐委員等肆意威逼乘機陷害則所得軍餉無多而於軍務地方大有關係該大臣務當於勸諭之中仍寓體恤之意不可一味恃威有乖政體至該大臣奏稱恐局外閒言搖惑視聽

曉曉瀆陳殊失大臣寅畏事君之義朝廷辦理庶務一秉大公該大臣若能將陝省回匪迅速剿除賊事不獨人言不能搖惑並當加以懋賞如空言夸飾毫無實效則罪有攸歸朝廷明目達聰亦非人言所能蒙蔽也將此由六百里諭令知之○諭官文奏請飭多隆阿速赴西安會同勝保殄除回匪各摺片多隆阿一軍自馳抵商雒後嚴扼要隘屢挫賊氛近因其剿滅竄豫巨捻陝防較鬆准令馳赴楚豫之交迅將陳德才殄滅再行入陝會剿至江南各營疾疫盛行南望增憂急思抽調多隆阿勁旅前往助剿是以諭令官文多隆阿斟酌辦理此時若卽令多隆阿帶兵入陝恐陳德才一股又將復熾深爲楚豫之憂且朝令暮改該將軍無所適從轉致貽誤官文此奏自係尙未知近日情形著卽會商多隆阿探明陝西江南何路軍情緊要先其所急奏請移兵會剿以壯軍威

仍於鄂省中得力將弁可以接替多隆阿者飭令統帶兵勇馳赴楚豫之交會同豫省將弁迅將陳得才一股併力殄除並駐軍於楚豫邊界堵截入陝擒匪俾多隆阿全軍可南可北得以會兵殲逆氛於大局實有裨益其籌辦襄鄖防剿事宜卽著照官文所擬辦理將此由六百里各諭令知之○申禁各省兵差騷擾○予河南陣亡遊擊余勝林卹廕○甲辰諭內閣給事中鍾佩賢奏併科鄉試省分請添派考官等語據稱近來各省鄉試每因軍務停止迫軍務平定兩科歸併舉行中額已加一倍更有捐輸廣額不在其內是考官取中之卷幾增倍半而考官猶循舊例乃用正副各一人深恐校閱稍有未周棄取必多未協嗣後凡有兩科並舉者請飭部於本內聲明照順天鄉試之例添派副考官一員同司衡校等語順天鄉試薈萃各省士子人數旣眾校閱亦繁是以向

例多派一二員以崇體制至各省人數有定比年以來因軍務停止閒有歸併舉行者中額雖多一倍人數並不加增各省主考經朝廷特簡自應悉心衡鑒以期拔取真才何至有校閱未周棄取未協之慮該給事中所請照順天鄉試之例添派考官之處徒更成法無裨掄才所奏著毋庸議○諭議政王軍機大臣等潘鐸韓超奏請暫畱田興恕勦辦黔匪一摺黔省勦辦匪徒正當喫緊之時田興恕著准其暫行畱任卽著帶兵出省赴下游一帶視賊勢趨重處所認真勦辦俟江忠義到黔後仍遵前旨赴川助勦毋再遷延前據毛鴻賓奏已令江忠義前赴貴州遵旨署理提督著卽催令速赴新任以使田興恕交卸赴川將此由五百里各諭令知之○諭據總理各國事務衙門奏稱江西湖南燒毀教堂之案迄今數月究應如何結局應酌度外省情形辦理等語習教之民猶

是朝廷赤子苟無悖亂不法之事卽不得意存歧視江西湖南兩省教堂被毀該教士等屋宇貨財等件數月未能歸結豈肯甘心此事自應速爲完結著沈葆楨毛鴻賓妥速辦理俾無異議卽著該撫等飛速覆奏該衙門及法國照會等共三件均著鈔給閱看將此由五百里各諭令知之尋沈葆楨奏江西燒毀教堂應由官酌給賠修之費毛鴻賓奏湖南燒毀教堂已將各該縣奏參摘頂勒限賠修並查拏倡首之人究辦報聞○以劉長佑爲兩廣總督張凱嵩爲廣西巡撫

由布政使遷

○乙巳諭議政王軍機大臣等有人

奏幫辦軍務水師總兵黃彬不理營務專以收取釐金侵吞肥己爲事並縱容所部艇師攔劫商民慘殺無辜有人見黃彬在船宴客聞卽粵逆渠魁並有接濟賊米之船經民團查獲該鎮輒藉詞搶案懲辦民團總兵李德麟恣情聲色滋擾居民總兵陳國泰賴



鎮海遊擊張瀚所部皆有通賊之事總兵泊承陞年老昏瞶不事  
操防揚州營參將常海咸豐八年郡城失守時先期逃避縱容兵  
丁拆毀民房強取木料坐地分肥泰州營遊擊文裕咸豐十年五  
月駐防九里溝聞薛成良兵警撤營逃匿又交結劣紳專事游宴  
吳全美賦性貪滑紀律不嚴各等語見在南岸之賊時思偷渡江  
北正水師防剿喫緊之時若委任此等劣員駐防江面必致與賊  
潛通消息勾結竄越於江防大有關係著會國藩李鴻章按照所  
參各款嚴密查辦如果通賊屬實卽著於審明後以軍法從事將  
不法弁兵勇丁嚴加裁汰整頓毋稍姑容原奏請以彭玉麟等三  
軍酌籌一軍接替之說黃翼升彭玉麟均分駐緊要隘口恐難移  
駛楊岳斌一軍會國藩本擬令赴下游而見在患病是否痊愈能  
否派令督帶艇師移紮下游江面此外有無可派之員如何妥協

布置之處並著曾國藩李鴻章悉心籌畫妥議具奏總期積弊悉除江防穩固方爲妥善原摺片均著鈔給閱看將此由六百里密諭知之○諭譚廷襄奏剿辦教匪連營進逼見在密籌攻取各情形一摺鳳凰山教匪依山結寨險峻難攻見有被脅入山之王存芳等薙髮歸誠該撫欲乘此機會使其彼此相離各生猜忌然後官兵乘之而入可以一鼓成功所籌尙屬可行惟此股匪徒前經僧格林沁大軍攻剿將次得手而匪首宋繼朋等率眾乞降僧格林沁赴豫後仍然背叛較前尤爲猖獗此時王存芳等因官兵緊逼鈔掠無路存糧日少情急投誠並未大受懲創難保非詭言試探竊我軍心該匪眾尙數萬其真心歸順者自當妥爲遣散准予自新其前此之已降復叛反覆不常者斷斷不能姑容再貽後患該撫見飭將王存芳等設法駕馭使其暗中出力引導大軍以賊

攻賊惟當密飭各營認真防守乘機進攻不得稍涉大意致有疏虞僅因機事不密或爲賊匪所乘惟該撫是問恐不能當此重咎也德勝額一軍攻剿雲谷山賊匪爲日已久前諭由城前等處進徧與各路官軍聯絡聲勢著譚廷襄催令趕緊移營或分軍扼紮匪寨之南以防竄突並著酌度情形飭令趕緊辦理無任藉詞延宕蘭山一帶攻克匪巢多處並收復南路各圍著飭該府縣等趕將西曠攻復以期漸次肅清另片奏博山之太和莊被匪徒翟雷攻破淄川革生劉德培暗中勾結該撫已調省兵飭吳載勳會合大營派往兵勇兜剿等語淄博一帶尙稱完善豈堪令匪剛滋擾著卽嚴飭吳載勳等迅速辦結不得任令蔓延將此由五百里諭令知之○諭駱秉章奏截剿石逆情形並散遣滇練酌畱林自清在川剿賊各一摺石逆自長甯敗遁後在川黔邊境避兵而行接

踵下竄不循原路以窺涪州卽由南川以出彭水黔江仍回楚境  
見咨湖南北兩省分防要隘飭吳安康一軍先至綦江以固縣城  
果毅護軍赴涪州以備截剿振武安定兩軍由江津直趨扶歡場  
以爲橫擊之師劉嶽昭督大隊埽蕩而前以清後路調總兵周達  
武所部楚勇徑趨黔江以遏奔軼所籌均極周妥惟該逆剽悍異  
常詭計百出此次先市場墮其狡謀致有挫失嗣後務當慎益加  
慎謀定後動不至再爲該匪所乘方爲妥善著賂秉章督飭各軍  
悉心籌畫堵剿兼施爲一鼓聚殲之計毋令乘間竄逸所稱准張  
亮基來咨並林自清稟稱僅畱弁練四百餘名情願在川剿賊等  
語林自清見與回眾不和強令回滇自難相安惟該總兵素形跋  
扈仍須妥爲駕馭以免再滋事端旣據該督將其所部立爲新果  
營令該總兵管帶前赴雲南提督軍營卽著飭令胡中和設法鈐

束令隨同攻勦滇匪立功自贖仍著賂秉章隨時察看加以訓飭毋稍疏虞將此由五百里諭令知之○命五城增廠賑濟○陝回竄偏甘境諭恩麟嚴防○予四川陣亡副將姚美侖山東陣亡遊擊緒綸等祭葬世職○以劉坤一爲廣西布政使吳昌壽署廣東按察使出候補道署○丙午僧格林沁國瑞奏擒匪疊受懲創勢漸窮蹙閏八月初八日據翼長全順等稟報擒首李加英懇請率眾投誠該翼長卽與恆齡卓明阿帶隊前往鞠家集先將該匪巢穴清理擒首李加英旋率小擒首賈瑞金等十一名到永城乞降經全順訊供解送來營據李加英遞有稟詞甚屬懇切情願帶領降眾數百名效力贖罪並有永城紳民聯名保狀臣等詳審各情實係悔罪投誠自應仰體 皇仁寬其既往當卽准予薙髮令其前赴永城前敵營內效力贖罪並發給免死護牌以期日久相安其餘

降眾已飭全順選擇精壯者准其與李加英隨隊報效一俟永城  
迤南道塗乾涸卽當督隊向前攻剿並經札飭黃開榜一軍移紮  
宿州以期聲勢聯絡臣等見擬由北路進攻捻巢已將情形咨行  
袁甲三吳棠於亳東防剿如何各分汛地及派官兵由何路進剿  
之處籌商咨覆並飭安肅道蔣凝學帶領楚勇卽由西南沙河督  
隊向東北進剿其蔣凝學是否堪以統帶官軍抑或添派得力提  
鎮大員督辦之處仍咨行留國藩作速咨覆並咨商該大臣轉飭  
苗沛霖實力剿匪卽由蒙城進攻賊圩至勝保軍營臣等遵將新調到營  
勒奉旨令將前調沐省馬隊飭赴勝保軍營臣等遵將新調到營  
之官兵二百四十九員名撥給馬匹器械飭委營總音德善管帶  
迅卽啟程前往勝保軍營以資攻剿其餘患病並無馬官兵一百  
餘名仍畱營調養毋庸撥往再據德楞額稟報進剿盤踞雲谷山

下棍匪疊於惡石口定花盤等處獲勝匪眾向費縣竄去復探得匪首劉雙印身帶槍傷逃上雲谷山卽督隊往攻等情已飭德楞額作速進剿迅將此股棍匪掃滅以便會剿敎匪 上諭議政王軍機大臣等李加英率眾投誠既據該大臣察其情詞懇切自可寬其既往予以自新惟所繳槍礮見仍酌量給還該擒等狼子野心仍當嚴密管束毋令恃有免死護牌復萌故態僧格林沁見令其前赴永城前敵效力著卽飭令督隊前進攻剿賊巢該大臣擬由北路進兵情形咨行袁甲三等籌商防剿並咨會曾國藩轉飭苗沛霖實力進剿俟計議已定一面奏聞一面分路進攻以期擒穴擒渠廓清積年巨患副都統德楞額辦雲谷山棍匪雖小有斬擒尙未大受懲創昨據譚廷襄奏敎匪王存芳等情急投降該撫令其暗中出力引導大軍乘機進取正須厚集兵力一鼓成功

著僧格林沁嚴飭德楞額迅將雲谷山剋期攻拔卽就近移營會  
剿教匪毋任遷延貽誤前有人奏署河南臬司洪貞謙品行卑污  
請撤任查辦等語僧格林沁駐軍歸德自必有所見聞該署司平  
日官聲何如帶勇接仗曾否得力著該大臣確切查明據實具奏  
將此由六百里諭令知之○諭劉長佑尙在潯州到任需時勞崇  
光著暫緩離任該前督晏被中外參劾訪查均實卽予以罷斥亦  
屬罪所應得第以任用有年稍示薄懲若於劉長佑未到之先存  
五日京兆之見一切事務不盡心籌辦意存委卸則是有心貽誤  
萬難再恕懷之勉之劉坤一已簡放廣西藩司卽著催令赴任不  
准延緩有誤防剿將此由五百里諭令知之○諭劉長佑見赴潯  
州剿匪正當得手若遽赴新任恐致軍心懈怠張凱嵩在粵年久  
於吏治頗稱嫻熟能否出省帶兵或司道提鎮中有才堪調度者



著劉長佑酌派一二員令其統帶該督卽馳赴粵東接印聞該省捐釐事務勞崇光辦理失宜悉爲官吏中飽地方愈形彫敝該督於到任後悉心講求認真整頓一切弊端嚴行革除庶餉源有出而商旅不擾方爲妥善該省鹽務浸灌湖南等處銷路甚廣而課項愈絀歷年奏銷延不造報廢弛情形甚屬可惡並著劉長佑盡心整理毋任貪吏侵蝕粵東爲各國通商之地遇有交涉事件尤當迅速辦理如可准行者卽予准行有窒礙者據理駁斥總期不亢不卑信義相與辦理方可得宜無所牽掣愈得以盡心地方振興庶務高州軍務並陽春縣土客互鬪之案何以尙未肅清著劉長佑嚴飭在事員弁迅速勦辦如前此辦理未協卽行從嚴參辦粵省吏治廢弛該督務當於屬吏中畱心訪查如賢能稱職者立登薦牘其開茸貪污者卽行參劾斷不可稍涉瞻顧該督仰邀知

遇不數年間擢任兼圻務當益矢忠勤於地方利弊盡心籌辦毋負朝廷異數之恩將此由六百里諭令知之○丁未明誼等奏俄國公使堅執條約內所載有西疆尙在未定之交界此後應順山嶺大河之流及見在中國常住卡倫爲界之語另繪地圖內點紅色爲限欲將常住卡倫以外作爲應給該國之地臣等據理駁斥匡蘇勒官雜哈勞復肆爭執查勒布什有乾隆年間所立石碣尙存阿勒臺烏梁海等處均係從前賞給蒙古游牧之地其爲中華舊有實有明證該蒙古世受國恩必不肯隸俄國將來必致激變奏入命明誼等曉以利害諭以情理不可遷就了事○常清奏伊犁西北博羅胡吉爾卡倫附近地方忽有俄國兵隊三四百人執持器械礮車伐木挖土經臣密選勁旅防範並派委委員前往曉諭一面飛咨明誼等於會議時向該國使臣理論奏入 上是之

○予山東陣亡舉人程縉入祀昭忠祠○戊申諭內閣前因通政司參議彭祖賢奏請疏通粵鹽當令戶部議奏茲據奏稱廣東鹽務改引用票是否確有實效請飭各該督撫酌覈辦理等語著劉長佑查照該參議所奏會同廣西湖南江西福建貴州各督撫酌覈奏明辦理至廣東自道光三十年起至咸豐七年止省河等處欠完正課及分限帶徵銀兩至今均未完報省河潮橋各商歷年積欠帑本息銀及未完正鹽場羨等項應如何徵完之處並未據報部覈辦咸豐八九等年引課奏銷亦未據造報實屬疲玩已極著劉長佑嚴飭該運使將前項未完各款實力催完並將八九等年引課催完趕緊奏銷儻再遲延卽著該部指名嚴參○諭議政王軍機大臣等戶部奏長蘆懸岸於道光二十八年暨咸豐十年疊經奏定章程勒限招商辦理茲查咸豐九年奏銷冊報懸岸仍

未招商其間各官商捆運交完懸岸課款之處咸豐八年冊報徵補銀八萬四千餘兩九年僅徵補銀五萬餘兩逐年遞形短少再懸岸引地招募商販捆運向由運使給票不用部引每年行銷若干無從稽考仍令遵照戶部前咨用部頒之引加蓋字樣發給以憑查覈又長蘆積欠銀二千三百餘萬兩前經奏定自道光二十九年每年按引攤補十七萬餘兩近查奏銷冊並未完報嗣後務飭按引攤完各等語長蘆懸岸共七十餘處各官商辦理捆運交課較輕自必日形踴躍鹽有銷路卽課有來源何以懸岸課款節年遞形短絀著文煜督飭運司將見在有人捆運之處係何口岸每年運鹽若干交課若干有無影射蒙混以多報少及無人承辦各岸有無私運私銷確切查明據實報部並著該部前咨將懸岸運銷之鹽卽用部頒之引由該運司加蓋行銷懸岸引地字樣

發給以歸覈實仍飭該運司趕緊一律招商認辦應如何設法招徠之處卽著悉心酌覈奏明辦理至長蘆積欠銀二千三百餘萬兩並著文煜飭該運司認真查覈務令各商按引攤完毋令欠項虛懸致干參辦原片著鈔給閱看將此諭令知之○諭戶部奏遵議通政司參議彭祖賢奏疏通粵鹽以濟京餉一摺著劉長佑查照該參議所奏體察情形會同張凱嵩毛鴻賓沈葆楨徐宗幹轉超悉心酌覈奏明辦理至彭祖賢條陳電茂博茂等場得缺到省交銀一萬兩其餘缺分較次者遞減至數千兩不等方准到任前係陋規近則歸公等語此項歸公銀兩作何動用從未據該省報部著劉長佑詳細查明具奏劉長佑新授兩廣總督於從前積弊無所用其回護務當振刷精神認真釐剔以期有利無弊原摺均著鈔給閱看將此由五百里各諭令知之○李續宜奏接唐訓方

來函該署撫已於閏八月十三日自湖北啟行計二十日後定可  
行抵安慶臣擬於閏八月二十六日啟程回籍料理臣母喪葬等  
事藉省臣父起居以廣臣聖主錫類之仁再臣接道員蔣凝學來  
稟苗沛霖於八月間將壽州正陽關先後退出知該道於二十一  
日已至壽州布置防守事宜查蔣凝學固屬因勢利導而苗沛霖  
亦非慢無悔心前既擒獻陳逆今又退出城關從此痛改前非臣  
自當稱物平施飭部下各將寬其既往誘以自新冀安各路反側  
之心而策叛練桑榆之效臣上諭唐訓方已由楚北啟行計日可  
抵安慶李續宜務將地方情形及軍務應辦事宜詳細告知以便  
接辦前據僧格林沁奏擬令苗練剿賊自贖當經諭令該大臣與  
曾國藩毛昶熙吳棠唐訓方等察度苗沛霖情形是否真心悔罪  
妥籌辦理見在壽州正陽城關雖經退出而潁上縣城尙爲該練

所踞曾否一併退出交官其從前偏脅附近各民圩曾否解散悉歸地方官約束均著唐訓方於馳抵臨淮後查明具奏次第辦理本日已將李續宜原摺鈔寄僧格林沁閱看並著唐訓方與僧格林沁隨時商酌一面督飭蔣凝學妥籌撫輯以安反側之心毋稍大意本日據羅惇衍奏請迅飭李續宜回任一摺已明降諭旨令該撫回籍後將母喪趕緊辦理事畢卽行赴皖見在皖北捻匪未平苗練甫經就範皖南大股賊眾麇聚廣德正當防剿喫緊之時亟須得人而理該撫務當體朝廷不得已之苦衷移孝作忠力顧皖省全局以副委任毋稍耽延將此由六百里諭令知之○諭毛鴻賓奏楚師越境剿撫黔屬各寨攻克漢寨老巢見籌辦理情形一摺逆首姜映芳距守漢寨十有餘年勾煽甚眾經楚師越境攻克尙未得手漢寨既克百姓幸復見天日韓超務飭妥爲安撫勿

致再亂姜逆是否被官兵殺斃抑係在漢寨壘中被焚仍著查明具奏如係脫逃卽飭各營接捕務獲訊明正法毋任漏網石阡張家寨股匪復有下竄銅仁之勢遊擊包順科已分帶援軍與銅仁協兵勇聯絡堵禦該處勇力過單著卽飭周洪印戈鑑兩軍移師勦辦石逆由四川竄入仁懷該處東入酉秀與黔之松桃思南楚南之永綏龍山楚北之咸豐利川在在毗連前已諭令駱秉章悉心籌畫爲一鼓聚殲之計仍著懷遵前旨督飭劉嶽昭等分投堵勦毋令乘間竄逸並著官文嚴樹森毛鴻賓韓超於連界各處多設偵探飭地方官不分畛域合力勦除以清積年巨患趙福元一軍卽飭探蹤勦擊毋得株守一隅以資得力廣西蓮塘久爲賊踞著張凱嵩督飭易元泰等會合楚軍實力勦辦一鼓殄除毋再延玩將此由六百里各諭令知之○予故直隸道員劉煦建祠○已



西總理各國事務衙門奏俄國公使把雷捷克遞該衙門照會內稱該國見派水師提督頗頗福帶領兵船前赴中國如賊匪擾亂緊要海口該提督幫同中國官兵堵禦擊退請代爲具奏等情甯波上海業經英法二國派兵幫同防剿見在俄國兵船前來助剿可否令與英法二國合力勦辦抑此外另有緊要應防海口專令俄國會同該處帶兵官設法防禦請飭下曾國藩等妥籌辦理奏入命曾國藩薛煥李鴻章籌商覆奏○命官文爲文華殿大學士倭仁爲文淵閣大學士